

續修白鹽井志

卷玖

卷九

藝文志上

書目  
詔令

奏議  
詳議

序著  
雜著

續修白鹽井藝文志上中下三卷

藝文志

制誥勅令君上之藝文也章疏奏議官師之藝文也  
記序雜著賦詩學士才人之藝文也藝文一志上古  
無徵漢班孟堅典校秘書本劉子駿七略以成之

劉班藝文乃目錄之學既非溯賈董亦非開韓歐  
嗣

是經生詞客以著述華國者振古如茲也白井開自  
漢唐盛于元明洎國朝而績學多士國計民生之攸

續修白鹽井志

卷八上藝文志

序略

一

關綱常名教之所繫傳舊續新紀載崇實燦然明備  
矣烽燧頻警有火其書而毀其板者歷久散佚搜採  
無存間有存者僅得諸抱遺訂墜斷碣殘碑耳茲仍  
舊輯間以新增考古者不無遺憾而依次類附編輯  
成卷亦足覘英華之所存云

上卷

書目

詔令

奏議

詳議

序

雜著

中卷

記

下卷

賦

詩

續修白鹽井志

卷八上藝文志

序略

二

書目 藝文志之一

嚴一詔四書講義 集亡卷 帙無考

嚴一詔易經講義 集亡卷 帙無考

楊光遠甘洲感應篇補註全部 行世集存

彭泰年錢園說 集亡卷 帙無考

李建中來易細註 集亡卷 帙無考

張伯桂紀勝集一卷

張輝堂課躬文稿八卷

李天駿桂香詩一卷

李官陶噲噫微言一卷

續修白鹽井志

卷八上藝文志 書目

李官陶蜀遊詩一卷

張輝堂藕塘雜詠四卷

李仙才石谷草一卷 集存

李仙才西圃集一卷 集存

李仙才百梅詩一卷

李仙才石城集一卷 集存

羅慶崧痘症精言一卷 集存

李 耀岐黃得心彙篇

張宸黼千家姓集一本 集亡

張季桂五經集字音釋一卷 集存

張敦樸覺世眞經詩一卷 行世集存

王培潤勸孝詩一冊 載孝弟錄  
集存

張 錕陰鷺文文章批註一部 行世集存

陳廷佐白鹽井志稿八卷

劉邦瑞白鹽井志八卷

郭存莊白鹽井志四卷

王子音白鹽井志補

羅羣芳聽秋吟二卷

續修白鹽井志

卷八上藝文志

書目

四

詔令 藝文志之二

唐元宗勅西南蠻大首領蒙歸義書 張九齡

勅蒙歸吐蕃於蠻擬行報復又嵩州鹽井本屬國家中間被其內侵近日始復收得卿與彼蕃落亦應具知吐蕃唯利是貪數論鹽井比有信使頻以爲辭今知其將兵擬侵蠻落兼取鹽井事似不虛國家與之通和未嘗有惡今既如此不可不防卿卽達奚守珪部落勤亦作團練候其有動然後可出兵必無事蹤亦不得先舉又嵩州相去道里稍遙若有驚急復須爲援並委卿與達奚守珪計會無失事宜卿於國盡誠在邊爲捍委寄得所朕復何憂秋中漸涼續修白鹽井志

卷八上藝文志

詔令

五

乾隆元年裁滇省鹽價盈餘以平鹽價

諭旨朕聞滇省鹽價昂貴每百觔自貳兩肆伍錢起竟有賣至肆兩以上者邊地百姓物力艱難僻壤夷民更爲窮苦每鹽價太貴有終年茹淡之事朕心深爲軫念查該省鹽課除正項外有增添盈餘以備地方公事之用朕思盈餘之名原係出於民力充裕之後若民食不充自無仍取盈餘之理著總督尹繼善悉心妥辦將盈餘一項卽行裁減令鹽價平減縱使昂貴亦只可在叁兩以下若裁去盈餘

之後公用有不敷處令行酌議請旨欽此

又禁煙戶鹽

諭旨各省鹽政辦理之法各異如雲南所產井鹽俱係府州縣領銷派定額數由各鹽井領運分銷辦課不許越界販賣通行已久兩迤衝繁之處人民輻輳不難照常銷引間或缺鹽借之鄰近州縣通融協濟其山僻州縣鄉村寫遠居民鮮少地方官恐蹈墮銷之咎關礙考成遂將鹽觔分派里甲挨戶分食官鹽按限繳課名曰煙戶鹽小民家口多者可以照數納銀若貧民家口無多餘鹽未曾食盡及期催追前課未完後派又至輾轉積累懸欠難償夫鹽爲

續修白鹽井志

卷八上藝文志

詔令

六

小民日用必需之物慮民遠涉是以因地制宜不徒爲銷引計也一則患鹽之不足一則患鹽之有餘俱非均平之道著該督撫酌量變通悉心妥議務使官不墮銷民無偏累欽此經督臣尹繼善等疏奏仍下戶部議覆

乾隆四年免雲南各鹽井歸公之項

諭旨雲南黑白琅等鹽井舊有規禮銀貳千捌百餘兩歸入公項下爲公事養廉之需在於每年發給薪本銀內扣解在當日柴價平減竈戶猶能供辦聞近年以來童山漸多薪價日貴兼之滷淡難煎所領薪本不敷購買柴薪之用竈戶未免艱難所當酌量變通以示存恤著將白琅貳井

節禮免其扣解俾竈戶薪本較前寬裕所有公項不敷統  
於銅息銀內撥補放給欽此

續修白鹽井志

卷八上藝文志

詔令

七

奏議

藝文志之三

請罷姚州表

唐  
張柬之

姚州古者哀牢之舊國絕域荒郊山高水深自生人以來  
泊於後代不與中國交通前漢唐蒙開夜郎滇笮而哀牢  
不附至光武季年始請內屬漢置永昌郡以統理之乃收  
其鹽布氈罽之稅以利中土其國西通大秦南通交趾奇  
珍異寶進貢歲時不缺劉備據有巴蜀常以甲兵不充及  
備死諸葛亮五月渡瀘收其金銀鹽布以益軍儲使張伯  
岐選其勁卒勇兵以增武備故蜀志稱自亮南征而國以  
富饒甲兵充足由此言之則前代置郡其利頗深今金銀

續修白鹽井志

卷八上藝文志

奏議

八

鹽布之稅不供奇珍之貢不入戈戟之用不實於戎行寶  
貨之資不輸於大國而空竭府庫驅率平人受役蠻彝肝  
膽塗地臣竊爲國家惜之漢以得利旣多厯博南山涉蘭  
滄水更置博南哀牢二縣蜀人愁怨行者作歌曰厯博南  
越蘭津渡蘭滄爲他人蓋譏漢貪珍奇鹽布之利而使爲  
蠻彝之所馳役也漢獲其利人且怨歌今減耗國儲費用  
日廣而使陛下之赤子身膏野草骸骨不歸老母幼子哀  
號望祭於千里之外於國家無絲髮之利在百姓受終身  
之酷臣竊爲國家痛之往者諸葛亮破南中使其渠帥自  
相統領不置漢官亦不留兵鎮守人問其故亮言置官留

兵有三不易大意以置官彝漢雜居猜嫌必起留兵運糧  
爲患更重忽若反叛勞費更多粗設紀綱自然久定臣竊  
以亮之此策妙得羈縻蠻彝之術今姚府所置之官旣無  
安邊靖寇之心又無亮且縱且擒之技唯知詭謀狡算恣  
情割剝貪饕劫掠積以爲常扇動酋渠遂成朋黨折支諂  
笑取媚蠻彝拜跪趨伏無復慙恥提挈子弟嘯引兇愚聚  
會蒲博一擲累萬劍南逋逃中原亡命有貳千餘戶見散  
在彼州專以掠奪爲業姚州本龍朔中武陵縣主簿石子  
仁奏置之後長史李孝讓辛文協並爲羣蠻所殺前朝遣  
郎將趙武貴討擊貴及蜀兵應時破敗噍類無遺又使將

續修白鹽井志

卷八上藝文志

奏議

九

軍李義總等往征郎將劉會基在陣戰死其州遂廢臣竊  
以諸葛亮稱置官留兵有三不易其言乃驗至垂拱四年  
蠻郎將王善寶昆州刺史爨乾福又請置州所有課稅自  
出姚府管內更不勞擾蜀中及置州後錄事參軍李陵爲  
蠻所殺延載中司馬成琛奏請於瀘南置鎮七所遣蜀兵  
防守自此蜀中騷擾於今不息且姚府總管五十七州巨  
猾遊客不可勝數國家設官分職以化俗防奸無恥無厭  
狼籍至此今不問夸夏負罪並深見道路劫殺不能禁止  
臣恐一朝驚擾爲禍轉大伏乞省罷姚州使隸儻府歲時  
朝覲同之蕃國瀘南諸鎮皆廢於瀘北置關百姓自非奉

使入蕃不許交通往來增嵩府兵選擇清良宰牧以統理之臣愚將爲穩便

鹽政奏議

雲南  
巡撫 愛必達

竊照滇省鹽務章程經臣會同督臣碩徹底清釐五條壹滇省原定鹽價低昂不齊請按照地方情形統行酌定數目每百觔自壹兩伍陸錢至貳兩叁兩不等與乾隆元年欽奉

諭旨每百觔總在叁兩以內之數相符壹滇省鹽觔惟黑白兩井額煎最多黑井鹽概運省店行銷白井鹽分運大理等府屬行銷其雲龍安甯琅阿陋草溪麗江景東抱母各

續修白鹽井志

卷八上藝文志

奏議

十

井或分給近便府州縣行銷或卽令本府兼辦均係歷年各按應徵課欸開報奏銷嗣於乾隆四年奏撥川鹽貳百肆拾餘萬又奏運粵鹽以致鹽多壅滯自應量爲增減原題川鹽另行撥銷並將增減改撥數目開造清冊送部壹各井員離任交盤應將支發薪本流滷及鋪販鹽觔各項應追應接統於冊內分別條欸交代一滇省行銷白井官專司督煎則奏銷督徵職名自應免其開列至該管知府有督徵之責行銷未完者應開列請參全完者亦應開列請敘以上均應如所議辦理一滇省井官督煎有無墮悞作何議敘議處亦應如所奏督煎井官如按年足額准照課

欵全完伍萬兩以下議敘之例紀錄一次其墮煎官亦照輕重分別議處得

旨如議行乾隆十六年議准

題明敬陳收買餘鹽之末議以恤竈艱以杜私販事竊查各井滷水係天地自然之利雖額徵已有定數而盈縮究屬靡常倘滷水有餘因限於定額不爲設法收買則竈戶生覬覦之心私煎射利奸民逞販鬻之技充斥營私附近井地州縣勢必有碍行銷正額但若僅照正鹽之價不爲分別量加薪本在竈戶既無餘潤可霑竊恐仍有透漏未肯踴躍交官至於此項鹽觔本在額數之外更必籌酌代銷

續修白鹽井志

卷八上藝文志

奏議

十一

之地庶鹽無壅滯帑免虛懸臣查有提舉白井所轄之觀界貳井約計本年可收買餘鹽貳拾萬觔該井正鹽每百觔定給薪本銀壹兩今應酌增銀叁錢又安豐井約計本年可收買餘鹽叁拾萬觔該井係官爲承辦並非竈戶領煎應照代煎雲龍井鹽事例每百觔給薪本銀壹兩壹錢毋庸議增請於該井收存課欵項下借動發給該提舉承領收買至行銷地方查有和曲祿勸阿迷大姚易門富民河西各州縣可以各照定價代銷除薪本脚價店費包裹等銀外共可獲餘息銀叁千伍百陸拾肆兩玖錢併可歸於積息項下報部充公庶窮竈咸沐

皇仁而私販不禁自絕於鹽政章程亦加周密

國計民生均屬有裨如蒙

聖恩准臣於奏銷時入冊送部查核再查井滷此盈彼縮難以預必未便著爲常額嗣後因時酌辦總視滷水之旺衰定餘鹽之多寡按年亦統於奏銷時報部是否有當伏乞

皇上訓示

題請開黑白琅三井廩增議

雲南  
巡撫圖

臣等會議雲南巡撫圖 疏稱看得黑白琅三井普洱鎮沅恩樂等府州縣

題請設學接准部文轉行遵照在案茲據布政使宮爾勸

續修白鹽井志

卷八上藝文志

奏議

十二

詳稱黑白琅三井已設學二十四年普洱府設學二十年鎮沅府恩樂縣均設學十七年現今士教漸多文風日盛案查昭通二府屬於雍正五年設學乾隆九年

題請開設廩增奉准部文每學各設廩增各捌名俟拾貳年後出貢歲科兩試考居優等者准予幫補廩增出貢等因遵照在案今黑白琅三井及普洱恩樂等五學取進文生均係捌名鎮沅取進拾名應請照昭通貳府之例黑白琅普洱恩樂伍學每學開設廩增各捌名鎮沅府學請設廩增各拾名黑白琅三井廩餼銀兩仍照原議於各該井鹽務餘銀內動用將用過銀數造入鹽課

冊內奏銷並照昭通東川貳府之例俟拾貳年後出貢仍照定例生員歲科兩試考居優等者准予幫補廩增出貢庶各生上進有階益加奮勉而認識保結亦專責成等因具

題前來查雲南所屬之黑白琅三井自雍正二年覆准設學額數取進文生各掇名普洱府於雍正七年覆准取進文生各掇名又鎮沅府於乾隆四年覆准威遠土州改隸鎮沅府管轄加取威遠童生貳名等因各在案再查定例生員歲科兩試考居優等者准予幫補廩增出貢等語今雲南所屬之黑白琅三井及普洱鎮沅恩樂

續修白鹽井志

卷八上藝文志

奏議

十三

等府縣從前係初設學額人文未盛故未添設增廩額數今該撫既稱黑白琅三井已設學二十四年普洱府設學二十年鎮沅府恩樂縣均係設學十七年現今士數漸多文風日盛請照昭通東川之例開設廩增等語應如所請黑白琅普洱恩樂等五學准其開設廩增各掇名鎮沅府准其開設廩增各拾名俟十二年出貢其幫補廩增仍照定例歲科兩試考居優等者准予幫補至疏稱黑白琅三井廩餼銀兩仍照原議於各該井鹽務餘銀內動用將用過銀數造入鹽課冊內奏銷其普洱鎮沅恩樂三學廩餼銀兩統於地丁銀內照例支給

造入地丁冊內奏銷等語亦應如所題黑白琅三井廩  
餼銀兩在於鹽務餘銀內動支給發仍將動用過銀數  
造入鹽課奏銷案內報部查核其普洱鎮沅恩樂三學  
廩餼銀兩准其在地丁銀內動給並將給過銀數於該  
年地丁冊內題報查核可也奉

旨依議

續修白鹽井志

卷八上藝文志

奏議

十四

詳議 藝文志之四

請復直隸鹽井等事 康熙四十三年提舉 鄭山

竊查除書廣輿開載姚安府所屬一州一縣而白井不與焉  
楚雄府所屬二州四縣而黑琅二井不與焉又每年賚進

表箋以及申上詳驗只書各井銜名並未將姚楚二府開列於上則三井不屬府轄明矣況向來事例井司專管鹽務凡有案件徑奉徑申本道並不干涉二府惟有捐輸穀石及緝捕逃盜等事出具冊給由府轉申以致每多遲滯疊蒙嚴飭在案且各井煎辦鹽觔起解課欸一應交代計冊

續修白鹽井志

卷八上藝文志

詳議

十五

俱申本道核轉其行鹽各府州縣未完課項係責井官督催二府既無與於考成三井自不應隸彼所轄合無請復直隸鹽井之制嗣遇捐輸命盜逃案等事徑奉徑申

藩臬 二憲毋庸再轉姚楚二府庶可隨奉隨報不致稽延

欽部憲件以省案牘之繁以免府差之累則黑白琅三井官竈均沐培植之恩於無暨矣緣係請復舊制事理相應聯銜會詳伏候批示遵行等因詳

督撫 兩院憲暨 藩臬 二司鹽法道在案

前事批詞

雲南藩憲 劉 櫟

查得白井提舉等會詳請復直隸一案本司道會查提舉

一官煎鹽是其耑責凡一切事件應令徑奉徑申業奉前  
憲批允因

撫憲慎重周詳飭令照舊遵守本司會飭在案今據提舉  
又復縷晰會詳前來本司覆查提舉原無地方錢糧之責  
自無命盜倉庫可任誠如該提舉等所稱井產某處就井  
駐劄惟督竈丁煎辦已耳况督煎督催處分亦止鹽課若  
知府一官竟渺不相涉者也既不受督催之處應無再受  
管轄之理且勤惰賢否鹽道考查不煩民事奚煩知府轉  
折稽核致悞時日應如所請改復直隸凡井上逃盜命案  
一聽地方官稽查承審其捐輸一項年將所收穀石運至

續修白鹽井志

卷八上藝文志

詳議

十六

州縣倉貯聽候該府盤查惟遇有井地逃盜等事協力共  
緝不得隱匿徇庇並膜視不問其一切

欽部事件該提舉徑奉徑申職守專而案件速矣再查該提  
舉既無民社之責 憲台批示遵守無庸咨

部可也等因奉批仰候 撫部院批示繳奉此先於  
本年十二月十二日奉

巡撫雲南都察院加一級佟批據本司詳同前由奉批如  
詳飭行遵照繳奉此擬合咨移貴道轉行該府並提舉一  
體知照施行等因咨道行職並奉

藩臬

二司檄行知照奉

此卑職仰荷憲恩准復白井直隸何敢再爲置喙但自奉

文之後姚安府卽大張告示諭令白井紳士約保竈丁住戶人等嗣後人命逃盜戶婚田土鬪毆爭訟火甲門差以及新進生員迎送謁廟一切鉅細事理槩行呈報姚州稽查審理毋得借稱井地混報其五井五牌住戶不得應答夫役州縣師生亦不得伺候朔望行香如敢故違立拿重責枷示等語隨有姚州差吏曰王宜到井另編保甲朔望逼勒鄉保赴州點卯差拘票喚擾害無休人人各思逃亡以避府州虐燄卑職再三安慰方始甯貼查井地保甲久已清編在冊若疑戶口脫漏當編於未經奉文直隸之前鄉約竈長朔望赴州點卯是亦分所宜然但白井距州二

續修白鹽井志

卷八上藝文志

詳議

十七

諭拜牌行香祭丁是皆尊

君師而宣教化治體攸關何得禁諸生之伺候蔑廢典禮至於此極若夫事關命盜以及鬪毆賭博酗酒行兇等事該府不令投報井官卑職正可藉此偷閑深爲慶幸第恐奸宄乘機竊發有負

憲檄遇有事故協力共緝不得膜視之誥誡耳因查白井舊治東至湯家衝山頂界碑止西至寶關山頂止南至白塔了口止北至王家山嘴止前於康熙三十一年間總督雲貴部院范巡歷邊境親臨井地建牌立界界內井官管轄界外屬之州縣由來久矣近奉 憲行以逃盜命案捐輸事件聽地方官稽查承審其一切

欽部憲件行令井司徑奉徑申卑職正在凜遵而該府州紛更成憲借故生風以致井民卧不貼席卑職難容緘默理合具實詳明伏乞 憲臺俯賜轉請嚴飭該府州各安職守無致擾累井竈

續修白鹽井志

卷八上藝文志

詳議

十八

國課幸甚卑職幸甚等因詳奉

布政使司加三級佟 批凡井地真正命盜案件移解地方官承審該提舉協力共緝其一切平常稽緝等事遵照前立界限徑行查核具報各安職守毋得攙越并候嚴飭楚姚二府知照仍候 臬司 鹽道批示繳奉此全日又奉 按察使司劉批仰候藩司鹽道會議畫一規例遵照奉行繳奉此又奉 本道批仰候移咨會議另檄行知繳

前事咨司會議

雲南鹽道 李 苾

查得井地所居果係竈戶竈生背夫鋸夫汲滷小工並井兵衙役人等居住井界內外原有分別督煎課鹽督徵錢

糧各有責成其來舊矣惟多此提舉一官不屬府轄致爲該府眼中釘苛求搜索官竈均不得甯查貴司前據文詳議內所云逃盜人命一聽地方官稽查承審者乃真正命盜逃案地方官例有處分之責難容諉悞耳捐輸穀石運州縣收貯者以該府有盤查之責難容虧缺耳井地等事提舉協力共緝不得隱庇者恐有逃盜命案井官諱匿不報嫁禍於地方官耳本道細繹前詳至公至平至詳至善是地方井司各官自宜凜遵各安職守何該府一旦不遂所欲吹毛索瘢借命盜而搜求凡鬪毆口角火甲門差生員伺候謁

續修白鹽井志

卷八上藝文志

詳議

十九

廟行香種種細故槩欲禁絕動令掣肘是誠何心夫鬪毆細故鄉保頭人亦可排解况井竈爲提舉所轄豈不能剖其是非而必拘質於州縣之庭耶且

欽部案件尙令其徑奉徑申何況此區區細故乎井地原無城郭凡存倉鹽觔貯庫薪本盡關

朝廷兵餉派撥火甲巡更守宿是其常理竈生伺候謁

廟行香乃其固然何爲過分且竈戶類皆窮丁一日有一日之業一戶有一戶之課若遇事生風波連株及將來悞煎悞課誰任其咎本道職司鹽務所論恐屬左祖在貴司自有持平相應移請裁奪或會詳兩院批示或徑飭該府州

井司遵照惟聽鴻裁酌奪施行

前事

雲南藩憲 李華之

查看得井地煎鹽辦課兵餉攸關稍有墮悞卽干處分且三井原有疆界今既改爲直隸各有專責嗣凡井地界內遇有眞命大盜案件聽井官移解州縣承審若查緝逃盜及平常爭鬪輕生一切細故鄉保就近投報井司提舉徑申徑覆其拜

牌謁 廟行香宣講

上諭各井生員照前伺候排甲居民仍前承值守護毋得因府州差擾逃匿畏避有悞煎辦倘府州再差官役擅行到井

續修白鹽井志

卷八上藝文志

詳議

二十

借端滋擾許井官立即具報拏究除出示發三井張掛禁諭外擬合移覆會飭施行等因准此除給示禁諭外合行知照該提舉遵奉毋違奉此卑職遵將發下告示並奉

布 按二司頒發之示一併張掛曉諭在案

特詳請示以正紀綱等事

會查得姚安府所詳正紀綱以分疆界一案內稱浙江客民陸天麟以情急首告夏耳緒張捷元等於府該府差提四次提舉竟不發人遂以正紀綱分疆界並頒文書體格率意通詳經蒙 督憲批示提舉雖從五品乃鹽道所轄並非知府屬員是以稱雲南某井提舉不加某府字樣該

府何得稱爲舊轄雖鹽井係府屬地方而錢糧詞訟仍係知府之事提舉並未越職濫行惟商民具告竈戶提舉自審發落今該府詳請分地管理殊屬妄誕至於文書嗣後提舉行知府應用牒呈知府行提舉應用故牒仰本司道分檄轉飭毋再有違致干叅究仍候 撫部院批示繳在案茲蒙 憲臺批查前因本司道將已奉 督部院批語備錄會詳伏候批示遵行等因奉批仰照督部院批示飭遵繳奉此相應咨移貴道煩請會飭施行准此擬合行知等因到職遵奉在案

詳明儀注文移以便遵守事

黑井  
提舉 陳應科

續修白鹽井志

卷八上藝文志

詳議二十一

竊照

朝廷設官分職上下等威向有定例卑職於六十年十一月內選補黑鹽井鹽課提舉司恩蒙

聖祖仁皇帝於次年正月二十一日在

暢春苑澹甯居引見先儘京官部屬次及外官道員道員之後卽知府知府之後卽同知同知之後卽卑職提舉次後通判州縣濟濟威儀誰敢隕越况禮莫嚴於覲

君儀莫肅於

宸側是提舉一官分正從於同知居六夫之職任守齟政之規模實非有州縣地方之責爲知府耑轄之屬員也明矣

今滇省知府於同知通判文移儀注俱係平行獨提舉司衙門計典又無知府考成文盤亦無知府責任一應欽部事件奉司道各憲徑行徑申並無轉行之事成例已久昭昭可鑒或遇偶有事件與知府文移往還者知府徑行右牌仰某井提舉准此加以硃筆不知遵何成例夫右牌仰乃行屬之文移提舉並非知府屬員一管地方一管鹽務毫無干涉所謂風馬牛不相及者也若以右牌仰之硃筆行之此乃鹽道行提舉之憲體蓋鹽道係是提舉親臨上司體制應當如是而知府亦以右牌仰行之是提舉又多一知府之上司矣因是彼此忿爭往往不睦殊失續修白鹽井志

卷八上藝文志<sub>詳議</sub>二十二

官常協和之道不得不詳請憲臺查明成例批定文移並懇轉詳兩院鈞批畫一永爲成式庶幾得以遵守而無隕越之虞矣

批詞錄後

雲南藩憲李衛

提舉一官與知府原無統轄前經改爲直隸凡井地鹽務事件該提舉徑奉徑申司道各衙門者照舊不必由府轉報但事有分別亦當各照職守如逃盜命案及有關題達咨部者俱應仍由知府具詳其捐輸穀石亦應運至地方官倉貯聽該府盤查出結至文移儀注若聽其顛倒必互相不符查品級考內同知提舉係正從五品較通判稍

優與直隸州無異俟後該提舉與知府往來文移儀注亦悉照同知通判一體以昭成規坐次列於通判之前同知之後卽直隸州亦非知府屬員從未見有手本牒稟之行况無統轄乎仰卽遵照永爲定例除咨移驛鹽道衙門立案並檄姚楚二府遵行外擬合知照白井提舉司一體遵奉毋違

詳免協修藩署以甦竈困事

白井提舉 劉邦瑞

查得白井彈丸一區幅幘不足十里所居惟有竈戶井兵以及背滷夫役日事煎辦以裕課餉提舉一官職只督煎督催其勤惰賢否考核出自憲臺與姚安府毫無干涉經續修白鹽井志

卷八上藝文志詳議二十三

前任井司鄭山會同黑琅兩提舉於康熙四十三四兩年內疊次詳請直隸以專職守蒙  
督撫部院批司道會議以井界內外各分管轄關內屬井關外屬府提舉原無地方田糧之責自無命盜倉庫可任毋庸受府管轄其一切

欽部憲件許提舉徑奉徑申等因詳奉批允飭行遵守在案二十年來官竈相安惟有修理藩署一項不知何故屢扳白井協應前於雍正二三兩年內一次移解過銀叁百貳拾玖兩叁錢零一次移解過銀叁百貳拾陸兩伍錢零今於雍正五年十月十六日又准護理姚安府印務姚州關

移雍正五年十月十四日奉

雲南等處承宣布政使司布政使加一級紀錄四次常憲牌內開爲照藩司衙門一切修理製備執事等項查係順甯姚安廣西三府承辦久有成例今新司到任在卽所有修備之項未便延緩合急飭行爲此牌仰該府官吏照牌事理限文到日卽便飭令家人經承速將應修應備之處查照往例會同刻期製應毋再遲延致干未便等因奉此擬合就移爲此合牒貴司卽便責令家人經承赴府會同本府經承星速往省刻期製應 新憲按臨在卽毋再遲延准此卑職查白井竈戶惟以煎鹽爲業並無寸田尺土續修白鹽井志

卷八上藝文志

詳議

二十四

如州縣之民可以隨糧派差而護府仍蹈漏例扳幫協修藩署窮竈萬難挖肉補瘡相應詳請俯賜轉詳

督撫

部院批免此項協修銀兩俾竈戶得以安心煎辦等因

詳奉督理雲南通省清軍驛傳鹽法按察使司分巡道劉批借公壓派大干法紀護府不遵

公令擅敢以承修藩署違例牒催仰提舉司移取護府職名立刻申送以憑詳叅繳奉此遵卽移取去後續於雍正六年八月初九日奉本道批據姚安府詳據前護府事姚州申稱遵查修理藩署一案係於康熙三十六年三月內奉署藩憲張據雲南等府詳稱除

督撫 憲署暨臬糧鹽學各衙門分鬪各府承值外如憲署則責成姚安順甯廣西三府實屬至公至平仰祈檄行遵守奉批仰府知會繼於四十五年七月內奉署藩憲劉牌開據白井提舉司詳稱修理藩署懇祈查明直隸之案酌行分派緣由到司既據詳稱井地一隅難照州縣按股應辦嗣遇修理藩署姚州大姚各應十分白井協應七分等因飭行遵奉在案至雍正三年常藩司蒞任劉提舉業已承應一次今新藩司履任伊邇奉前憲常檄催修理卑職行知姚州大姚俱已竭力清楚惟井司一分各行戶催迫難堪伏乞轉詳藩鹽二憲飭令提舉照例應辦庶免更張至

續修白鹽井志

卷八上藝文志

詳議

二十五

卑職職名應否開報伏候批示據此該卑府查得姚安原非大府至一州一縣各有抬送餉鞘押運軍裝遞解人犯等事絡繹不絕提舉止有修理藩署當日照分鬪派成例已久井司歷指直隸之名推諉不應將來此項卑府既無可捐復不敢派之州縣必致周章貽悞查前護府遵循舊例移催提舉照股均出茲奉查取職名似應邀恩免開其修理藩署井司一分現在虛懸應否遵照舊例伏乞批示遵行奉批既係舊例姑免深究今各衙署已於公件內酌定修理白井窮竈永禁派累仰提舉司勒石禁革仍移知姚安府遵照繳奉此當卽備移姚安府去後又於九月三

十日奉 雲南按察使司兼攝驛鹽道事趙批據姚安府  
詳前事奉批查此件該府於二月內申詳前道已批行提  
舉司勒石禁革矣仰遵原批應辦不得重復詳瀆繳等因  
批發到司合行勒石禁革爲此示仰白井眾竈戶一體遵  
奉無違須至勒石者

詳明廩生羅銓捐置義田

雍正元年

白井提舉

孔尙焜

爲孝義可風詳請旌獎永濟窮黎事雍正元年三月初一  
日據廩生羅銓詞稱銓父羅台垣在日曾有庭訓命銓置  
立義田濟彼窮乏銓經營竭力積累多年用價銀捌百肆  
拾兩置買近井雲南縣屬楊士司金旦庄田一區每年收

續修白鹽井志

卷八上藝文志

詳議

二十六

市斗租穀玖拾壹石陸斗計獲京斗租穀貳百石餘情願  
將此田捐作白井義產以濟窮民並將契券呈送到職又  
於六月初六日據稟內稱銓旣捐田錢糧應宜公納秋收  
在卽懇乞批示等情前來卑職看得羅銓稽古力學補廩  
食餼恪遵父訓置買庄田竭捐己資施濟窮黎蓋其慷慨  
行仁從容就義誠爲亘古迄今所難得之事也嗚呼世風  
日薄人意漸漓徒知利己妨人罔顧人心天理白井地雖  
褊小而富家不無一二率皆慳吝守錢孰是捨資爲眾卽  
遠推三姚遍及六詔但聞兄與弟相爭以財未聞父與子  
相尙以德也銓之孝義可風職用詳請旌獎立成文案永

杜侵漁仰懇 憲臺俯念台垣樂善在先共錫闡揚羅銓  
承德於後同錫褒寵庶使澆風易爲純俗而窮黎長霑實  
惠矣奉

兩院憲

楊高 暨潘憲 陳李

批廩生羅銓遵守父訓捐置義田以

成其父利濟之德深爲可嘉該司卽當鈐印立案永爲憑  
據其年獲租穀除辦納錢糧外仍令本生收掌以備賑散  
凡屬無告窮民令該提舉眼同按戶散給每於年終將散  
給過數目造冊註明領收姓名具文通報以憑查核務使  
與受皆實毋令吏役侵隱有負善念至該生孝義可嘉之  
處仰給匾旌獎以示鼓勵可也

續修白鹽井志

卷八上藝文志

詳議

二十七

詳請義捐田租准令雲南縣追收文

舉

康

勳

乾隆九年五月初三日奉

布政司批據白井拔貢生羅

士潔訴前事詞稱

云

云等情奉批仰白井提舉會同雲南

縣確查定議詳奪奉此於九月二十六日據貢生以俯釋

義捐之苦除蠹害以免遺累事具呈前來呈稱

云

云等情

據此卑職等會查得白井拔貢生羅士潔之父歲貢生羅  
銓買置金石一庄捐作白井義田以爲鰥寡孤獨冠婚喪  
祭之助後於雍正十三年奉撥給孤貧口糧又於乾隆元  
年議給白井兩義館學修穀各拾柒石其餘賑散窮民年  
終造冊通報在案迄今二十餘年人稠田少土縣丞楊國

臣意圖回贖因作義田不能遂欲乃串刁佃隱田抗租業經貢生呈訴提舉復詳前 憲陳批行雲南縣李令查勘隱抗情真詳明追究在案無如圖贖之念不已各佃之抗欠如前羅士潔管理掣肘是以卽於本年四月控訴 憲臺 蒙批職等確查定議茲卑職等會查此田既作義田應歸官管當日孔提舉詳奉各 憲批示仍令羅生收掌眼同井司散賑者誠恐一經官管胥吏不無滋弊耳所以土縣丞以及刁佃知其租穀雖爲捐賑而收掌仍係羅生尙可謀贖殊不知既已通詳在案斷無聽贖之理此土縣丞之妄想也但此後仍令本人收掌不特收租掣肘而覬

續修白鹽井志

卷八上藝文志

詳議

二十八

覬之心終不能絕茲據羅士潔具訴情願建蓋倉房以備收貯穀石可謂始終義舉卑職等議以此項穀石着令白井大使經收放年底造報至於各佃戶如果不抗租穀仍令佃種該雲南縣收具佃領移送白井提舉備案如各佃仍前抗租卽着雲南縣比追另招佃種如此一番清理則義捐可以永存施主可以無累緣奉批查事理是否妥協 職等未敢擅便理合詳請 憲臺俯賜衡奪批示遵行乾隆九年十一月二十三日詳奉

藩憲圖批如詳立案

詳明收買餘鹽未議事

雲南  
鹽憲 劉業長

本道覆查此項收買餘鹽雖經詳請

奏明每年收買貳拾萬觔定給薪本壹兩叁錢共該薪本銀貳千陸百兩奉准

部覆動項發給該提舉收買並將各該屬應銷鹽觔應完銀兩各數目飭行辦理但查前議此項鹽觔賣銷價值係照新定章程案內行銷白井事例每井稱百觔有稱頭貳拾觔內除脚人擦損折耗叁觔外尙有壹拾柒觔稱頭又安豐琅井餘鹽叁拾陸萬觔每百觔外有稱頭貳拾觔全數各照彼地賣價除還薪本脚價並店費包裹等項外尙有餘銀叁千伍百陸拾肆兩玖錢解道充公今章程內未續修白鹽井志

卷八上藝文志詳議二十九

奉 部覆准此項收買餘鹽除建水阿迷河西賣價相符現在領運銷辦其和曲等屬價值不符未便運銷此項餘鹽所有

奏明

部覆內年獲息銀叁千伍百陸拾肆兩玖錢係照章程案內定價賣銷銀兩應有之數今只有建水阿迷河西與奏明定價相符若照和曲等屬必須俟章程覆到增價發賣方與

奏明可獲餘息報數相符若照和曲等屬現今賣銷鹽觔價值計算與前數少獲餘息銀叁百壹拾捌兩肆錢目今十

七年將底恐鹽銷辦不及所獲餘息又不相覆可否仰邀  
憲恩收買白琅安豐鹽觔雖自十年收買起其和曲等屬  
賣銷餘鹽統俟章程

部覆至日銷賣仍請於

奏報時聲明至該提舉所請十八年分收買薪本應否併俟  
章程

部覆至日再發薪本收買抑或仍照常發給相應具詳請  
祈 憲臺俯賜查核批示施行等因呈詳奉批仰候  
撫部院批示錄報繳等因奉此先於本月十三日奉

巡撫愛 批據本道詳同前事緣由奉批查白安琅三井

續修白鹽井志

卷八上藝文志

詳議

三十

收買餘鹽俱自本年爲始已經

奏明在案今據白井提舉請領癸酉年薪本自應發給收買  
至和曲等屬現賣鹽價雖與章程不符但餘息銀已據該  
道核定詳

奏未便久置虛懸仰再悉心妥議另詳核奪仍候

督部堂批示繳等因奉此該本道查得白安琅三井收買  
餘鹽前經詳奉批飭發給薪木銀兩俱自本年煎起內除  
建水縣撥銷白豐二井餘鹽叁拾伍萬觔阿迷河西二州  
縣撥銷琅井餘鹽陸萬觔賣價俱與章程定價相符當卽  
飭行撥發領運銷辦在案至和曲大姚富民祿勸易門等

屬代銷白井餘鹽壹拾伍萬觔現今賣價與章程定價不符共少銀叁百壹拾捌兩肆錢是以具詳俟章程覆到銷賣蒙奉

憲臺批示和曲等屬現賣鹽價與章程不符但餘息銀兩已據該道核定詳

奏未便久置虛懸等因本道覆查和曲等屬因章程未定未便一鹽兩價至有此貴彼賤之異但至所獲餘息銀兩既經核定

奏明似屬短少然究係餘息銀兩不比正課且章程

部覆諒於歲內可到而建水河西阿迷等屬業經現在運

續修白鹽井志

卷八上藝文志

詳議

三十一

銷其和曲等五屬爲數只共餘鹽壹拾伍萬觔目下應一面催令速運到店俟章程覆到卽行趲銷統於

奏銷前解楚似可無悞緣奉查議事理相應詳請

憲臺俯賜查核批示以便轉飭遵照

請試行收買餘鹽以濟竈民事

提舉 郭在莊

竊查白鹽一井先因井滷回旺每月除煎正鹽足額之外尙有零星餘鹽於敬陳收買餘鹽事案內每百觔給薪本壹兩叁錢每年酌定該井收買餘鹽貳拾萬觔撥發各屬行銷蒙奉咨報飭遵在案嗣因該井滷水濃旺各竈除煎交月額並前項收買之外尙有所餘不得不籌畫收買請

照例每百觔給薪壹兩叁錢收買撥發各屬試銷蒙奉詳明飭令俟收一年如有成效實數另詳核轉請咨等因遵奉在案查自乾隆十九年二月奉文起連閏扣至十二月止一年限滿通共收買過白井各竈零星餘鹽貳拾貳萬伍千捌百觔分撥過楚雄縣領銷鹽肆萬玖千伍百觔大姚縣鹽伍萬壹千叁百觔南安州鹽叁萬伍千觔雲南縣鹽壹萬叁千貳百觔元謀縣鹽壹萬陸千捌百觔鎮南州鹽叁萬觔羅次縣鹽叁萬觔以上鹽貳拾貳萬伍千捌百觔俱經照數撥發各屬領銷並按月造冊申報在案卑職覆查井滷濃淡煎鹽盈縮原本乎天時而竈戶之貧富人

續修白鹽井志

卷八上藝文志

詳議

三十二

力之勤惰各殊如每歲冬春滷濃柴薪易辦各竈煎交月額之外不無零星餘剩自數觔以至數拾觔不等自應官爲收買以杜走漏倘至夏秋滷淡薪艱各竈有餘之戶柴薪足備或可有餘其貧難之戶僅可勉敷月額實難再有餘鹽卑職因此項餘鹽係屬零星收買尙未經試全年難以懸定况四季又有天時人事之不齊不便遽議定額當經詳准發給薪本試收餘鹽卑職竭力遵奉收買一年之期已滿僅收獲鹽貳拾貳萬伍千捌百觔現在各竈儘交餘鹽並無絲毫走漏則杜私益竈誠屬兩全惟是井滷旣不能保無盈縮而零星收買原屬多寡不等未便定爲常

額嗣後應請隨時辦理凡各竈每月交剩餘鹽儘數收買按月據實造報聽候分撥各屬添銷統俟年底將收獲配發確數分晰彙造清冊申報緣奉詳明試收餘鹽事理是  
否有當相應詳請

憲臺俯賜核轉請咨伏乞照詳施行

前事

等情據此該本司道查看得白鹽一井前因觀界二區滷水盈餘業於敬陳收買餘鹽之末議等事案內蒙奉  
憲臺恭摺

奏明每百觔增定薪本壹兩叁錢年定收買該井餘鹽貳拾

續修白鹽井志

卷八上藝文志

詳議

三十三

萬觔分撥建水和曲等屬行銷賣價除還薪本運腳盤費等項外餘銀歸入積餘項下報部充公因檄行白井提舉司遵照自乾隆十七年起按年照數收買撥銷在案嗣於乾隆十九年五月間又據提舉郭存莊詳稱白井各竈分井汲滷承辦鹽觔除交正額並前項收買之外尙有零星餘剩可以收買然未經全年試收遽難懸定容俟試辦一年果有實數成效再行確核詳請咨報等因當經據情會詳蒙奉批准一面發給薪本飭令該提舉遵照收買撥銷在案茲查此案試收餘鹽一年之期已屆實在收買若干並各屬試銷能否定爲年額俱經檄行議詳去後今據該

提舉詳稱奉檄詳明飭令試收餘鹽一年之期已滿僅收獲鹽貳拾貳萬伍千捌百觔現在五井並無私毫走漏則杜私益竈誠屬兩全惟是井滷既不能無盈縮而零星收買原屬多寡不等未便定爲常額嗣後應請隨時辦理凡各竈每月交剩餘鹽儘數收買按月據實造報聽候分撥各屬添銷統俟年底將收獲配發確數分晰造冊申報等情又據元謀縣南安州大姚等屬紛紛詳稟均以額重難於添銷或請停銷或請減撥各等情前來本司道覆查井滷衰旺各屬行銷多寡或因天時晴雨或遇年歲不齊煎辦行銷有餘不足必須隨時籌辦使竈無走漏之弊官無續修白鹽井志

卷八上藝文志

詳議

三十四

壅滯之虞課額官竈均無貽悞方屬有裨查白井內之觀界二井滷水盈餘業蒙

奏明議增薪本酌定每年收買餘鹽貳拾萬觔飭遵在案旋因井滷濃旺各竈除煎交正額並前項收買之外尙有零星餘剩餘鹽行據提舉郭存莊詳請試行收買並分撥各屬添銷當經詳明發給薪本飭令照例收買俟試收一年如果有實數成效另議詳請咨報今據該提舉查明井滷衰旺無定各竈零星餘剩多寡不等未便定額而添銷各屬又以額重難於加銷詳請酌減則是此項收買撥銷餘鹽均難定爲常額似應俯如該提舉所請俟後隨時辦理

凡白井各竈交剩餘鹽每百觔照例給薪壹兩叁錢按月儘數收買造報年底實在收獲配發若干一併據實分晰造冊申報轉請查核至所收獲鹽觔總視各屬易銷之處因時詳明添撥亦免定額自乾隆十九年二月起至該年十二月止收買配發過各屬領銷鹽貳拾貳萬伍千捌百觔核照各該屬賣價計算除還薪本運腳盤費等項外通共運獲餘銀貳千壹百柒拾肆兩叁錢壹分貳釐應請照數催收歸入該年各井

奏銷鹽務積餘冊內一併彙報歸公是否如斯相應將十九年分收買配發鹽觔辦獲餘銀數目詳冊呈報

續修白鹽井志

卷八上藝文志

詳議

三十五

憲臺俯賜查核咨

部並祈批示遵行計呈報清冊一本緣由呈詳奉批仰候撫部院核咨繳冊存奉此又於本月初八日奉撫部院愛批同前事緣由奉批仰候據詳咨部仍候

督部堂批示繳冊存送等因奉此除移明

藩司並行代銷餘鹽各屬外仰該提舉司官吏年底彙冊呈核並轉飭白井大使一體遵照無違

加給孤貧口糧示

提舉文源

照得本井向有額設孤貧三十一名按月發給口糧在案本井司下車以來每出街衢見有殘疾男婦呼天吃食者比比而是查問不在孤貧之列時當夏令尙不致有凍餒之虞一至隆冬恐難保其殘喘目擊情形心殊憫焉茲擬捐廉加發孤貧二十名非敢云博施濟眾不過欲貧民腹得暫飽免徒溝壑耳除諭井約查明確係殘疾無告者切實舉報外合亟出示曉諭爲此示仰井地貧民一體遵照果係身癯痼疾或隻身無告准赴井約處報名彙呈以憑驗明按月加發口糧而資生活如年力强壯身無殘疾自

續修白鹽井志

卷八上藝文志

詳議

三十六

能營生可活不准朦充捏報濫竿充數其各凜遵勿違特示

白井興教織紡請免釐稅以資誘掖事

節錄

提舉文源

竊白井產鹽而外不事農桑飭據舉人張如翼張之霖廩生張仲淑附生陳信孔稟請興辦織紡由卑職發給資本銀貳百兩交該舉人等購紗製機就井設局延聘工師男女並教雖通計烟戶不過七八百家今學成者已不下百人將來轉相習授機聲盈耳可免無襦之嘆矣茲據該舉人張如翼等稟稱此項工藝爲白井所無今開創伊始所出布疋往往工拙質重不敵廣布之精密邇來擴充添設

染房加工由粗入細使其有優無劣抵制川廣來路以期人樂購致利不外溢查姚州所出土布曾蒙稟免釐稅白井屬隸姚州事同一律況地只彈丸烟戶不多卽比戶皆織出布亦屬無幾當此啟迪誘掖尤應格外體恤擬懇轉稟援案豁免井地所織土布稅釐以資興起等情據此卑職覆查所稟係爲鼓勵工藝起見理合轉稟仰懇  
憲台俯賜查核援案准免井地所織土布稅釐以資觀感等情稟奉

各大憲批准立案在案

詳請加發薪本事

節錄

署鹽道

興 祿

續修白鹽井志

卷八上藝文志

詳議

三十七

據兼辦喬喇雲龍等井白井提舉文源稟遵扎飭查白井雲龍等井能否照喇雞鳴井提價加薪一案稟懇一體照加等情到道據此當此艱難時局竈情困憊亟應維持舍提價別無良策如果各井俱能提價壹錢則白喬雲龍等井亦卽一體照辦等情核與遵批會詳飭遵之案適相脗合應飭該提舉遵照自光緒二十八年正月初一日起將所管之白喬雲龍等井於賣鹽價內一律提加壹錢以作加薪俾甦竈困而顧課源等因詳奉  
兩院憲批准行飭遵辦在案

詳請加給薪本事

節錄

鹽憲

普 津

竊照職道案奉

憲台批據白井提舉文源稟遵札體察井情諭飭紳竈稟覆前來仍懇暫准援照黑井之案加給薪銀壹錢以紓竈困而免向隅□情一案奉批稟悉仰雲南鹽法道悉心核議詳發飭遵繳等因奉此查此案前據該提舉以黑井加薪關碍大局懇恩通飭照加以杜充銷而歸畫一等情會稟奉

憲台批道當經由道核明黑井加薪一案初據李署提舉一再具稟均經批駁係於三次稟奉

憲台批示應否暫准提價加薪仍勒限講求以煤煎鹽善

續修白鹽井志

卷八上藝文志

詳議

三十八

法以期經久是以由道會司核議詳准暫行提價壹錢加給各竈一俟用煤有效仍應停止俾免病民滯銷該提舉所稟改章之後通省稱價毫無參差鹽價不致兩歧乃足以杜充銷似不盡然惟銀賤錢荒各井竈困尙屬實情應飭援照黑井詳案田該提舉分別體察所管各井詳細詢議能否一律講求用煤煎鹽善法切實明白稟覆再行核辦等因呈覆分飭遵辦在案但近年銀賤錢荒米珠薪桂各井皆然以致原領薪本不敷煎辦自應設法調劑俾竈戶之煎交踴躍井員之銷征裕如然僅恃提價加薪而不籌經久善策誠如黑井加薪案內所奉

憲台批示設使柴薪日漲一日又將何以繼之此黑元永井暫准加薪必首重勒限辦煤也茲據稟奉前因本司職道悉心核議擬請一面如稟准自光緒三十一年冬月初一日起於該井現賣鹽價內提銀壹錢加給各竈以示體恤仍分飭該提舉嚴督該井各竈切實認真講求用煤卽素不產煤或運道較遠之井亦應另籌妥策以爲後繼一俟用煤之井辦有成效卽將此項加薪一律停止可免日久病民以示限制而期經久等因會詳奉兩院憲批准立案飭遵在案

稟請再加薪本事

提舉  
文源

續修白鹽井志

卷八上藝文志

詳議

三十九

窃卑職案奉

鹽憲扎開光緒三十二年十一月二十四日奉

督憲批據白井士竈張德盛等公稟縷呈疾苦懇加薪以甦竈困一案奉批近年因柴薪過貴故曾經由道詳請加薪原以示格外體恤乃竟貪得無饜瀆請不已殊屬非是未便照准等因批道轉行到井又奉批據雲龍五井竈紳解時和等公稟竈困已極泣懇俯准減額加薪以顧課欸而救垂危一案批飭所請減額碍難照准仍應遵照前批年終再行核計稟辦其薪本一項業經兩次通案酌加茲復據該竈等懇請前來查核井竈情困苦實較他井迥異

自不能不量予體恤而甦竈困俾顧課額究於銷情有無窒碍能否照准批令該提舉迅速體察稟覆核辦各等因奉此伏查卑職所管白喬喇雲等井困憊情形如出一轍雖迭經稟蒙加薪無如年歉錢荒米珠薪桂終莫能紓其窘困而艱苦則又以雲龍爲最迭據白喬喇雲各該井竈長稟請轉懇前來其所以遲迴不敢驟請加薪者時值路費起加之後鹽壅銷滯內被鄰私環充外受海私侵灌竈困雖應體恤課額尤當顧持惟以黑井竈情而論相形之下勢同伯仲該井上年尙蒙

憲恩賞准新加薪本壹錢似此情同事殊未免令其向隅  
續修白鹽井志  
卷八上藝文志詳議四十  
若不爲之籲懇

鴻施賞准一體照加不惟竈困難紓停煎者眾且恐銷情暢時藉口誤銷但刻下四井一同壅積驟議加薪則銷情更滯實於征解大有關繫再四籌思惟有擬懇

憲恩賞准一視同仁將白喬喇雲等井於現售鹽價外援照黑井之案賞准每加二八稱鹽百觔加薪本銀壹錢用作竈氣由官竈通力合作清釐銷岸將壅積之鹽疏銷如額再由卑職酌量情形隨時稟請定期起加以示體恤如此辦理庶官無虧額之虞竈有踴躍之心實於課款竈薪兩無窒碍抑卑職更百請者現在急務育材爲先卑職經

管各井除白喬喇三井先後開辦學堂外其雲龍一井至今尙未舉辦所以然者籌款爲難也卽白喬喇三井雖經開辦仍應擴充卑職擬此次稟請加薪如蒙

恩准將來起如之後擬以八分攤給竈戶以二分留辦學堂庶於體恤之中仍寓教育之義奉批前因除俟壅積暢通另由卑職擇期起加外是否有當理合肅具蕪稟仰祈憲台俯賜衡核批示祇遵等情稟奉

各大憲批飭俟存鹽銷盡再行議加在案

稟籌款種松以恤竈艱事

提舉  
文源

竊查卑職經管白井向係煎滷成鹽用薪最廣日有砍伐

續修白鹽井志

卷八上藝文志

詳議

四十一

年少補種以致四山多童採取供煎者遠出三四十里以外挽運旣艱薪價倍昂竈戶獲利無幾煎交率多觀望查種植之利中西豔稱况竈戶以前煎鹽爲事畜而種樹爲煎鹽之根本卑職迭飭補種爲未雨之綢繆該竈等祇計近功忽他日之遠利久所縈念思有挽回雖遞年捐廉購種以爲之倡奈事無專責每罹野火致棄前功乃復集紳竈籌維查向章公局每逢年節有送署水禮卑職到任時卽經裁免用爲種松迄末議行茲乃通計各節水禮共減的款銀四百七十餘兩按年提出專作種松常款選派井紳六人以一人爲總辦以五人爲五井分辦妥定章程遞年

播種薪近及遠使無間斷培蓄數載樵採以時豈只由廣  
價廉將見林木不可勝用也除出示曉諭並分諭充當實  
力興辦外所有卑職籌欸種樹擬定章程諭飭遵辦各緣  
由是否有當理合開具清摺稟陳仰祈  
憲台俯賜查核立案示遵再卑井屬隸姚州而種樹山場  
多在姚州大姚之間可否仰懇

憲恩賞准行飭姚州大姚兩州縣諭飭村庄頭人認真稽  
查如見野火刻集村人立往撲滅赴井照章領賞倘見火  
不管准由卑職就近差提究賠用昭勸懲等因奉  
各大憲批准立案飭遵在案

續修白鹽井志

卷八上藝文志

詳議

四十二

遵札查明卷金提辦學堂等事

節錄

提舉  
文源

竊卑職前於光緒三十年正月內將卑井向有之龍吟書  
院合併算學改辦白井小學合原有膏火及續籌算學經  
費考選生童十二名延聘中算兩教習分班課授遵照

欽章按程進學加定學規認真課督並添設蒙養各堂先後稟  
奉批准立案在案復奉高等學堂札奉

督憲札奉

上諭停止科舉歲科試推廣學堂等因飭將向來卷金賓興各  
費查明提充學堂經費廣為添設以宏教育轉飭到井遵

照辦理奉此伏查卑井向准於書院經費內每銷鹽百觔扣留壹分充作課試膏火按銷情之長短定所收之多寡每年約能收銀肆百五十兩至五百兩不等除去月課考試膏火外其餘卽由紳管收作鄉會科歲赴試卷金前於併辦學堂案內業經開摺詳晰聲明在案茲鄉會科歲既奉停止每月課試亦經停考一切卷金月課膏火悉應查提作充學堂經費飭據卑井紳管舉人王守道張如翼等確查開報前來除本年以前積存卷金月課等銀案經稟請添充修復靈源書院不計外卽自三十二年所收各欸亟應通籌併計查明提出擴充小蒙各學堂籌添名額

續修白鹽井志

卷八上藝文志

詳議

四十三

而廣作育核計每年留扣壹分膏火至多有銀五百兩除原案請撥算學經費銀壹百五十兩外實有卷金月課膏火銀三百五十兩又算學原案通共籌獲銀五百兩加向支蒙學由學租年提銀五十兩又卑職籌節欸項發商存放年收息銀二十五兩通共每年約合收銀九百二十五兩又每年由賣鹽籃草內提獲錢三百六十二千文此卑井興辦學堂原有膏火卷金之的欸也至於支欸項下原定算學教習每月束修銀拾貳兩年合銀壹百四十四兩又監學舉人一名月支銀四兩茶水支銀三兩堂役月支銀二兩管事月支銀一兩以上四項月共支銀十兩除

腊正放學年以十個月計算合銀壹百兩又中文教習原係由籃草錢文內籌送錢壹百壹拾六千文又每年加修銀二十兩皆屬原定之欸應仍照舊支放外至於堂內生童原定生員捌名童生四名茲擬加成二十六名內係生員十六名童生十名照案每月仍各准支伙食銀一兩五錢除腊正放學外年合支銀三百九十兩本年已於二月初一日考選開學由卑職切實監督責令中算兩教員常川住宿學堂遵照

欽定章程及加定學規分早午晚三候將功課教法按照日程

規度盡心訓迪講解記誦務在詳明測繪輿圖悉歸精當

續修白鹽井志

卷八上藝文志

詳議

四十四

修身體操勿容間斷至於蒙學爲發端之始原設東西南北中五館嗣經卑職籌欸生息添設又中蒙學一堂共成官立蒙學六堂向來支銀支錢悉就原有之欸未免紛歧茲經卑職酌定除各竈加修不計外每堂每年概以錢五十千文發給共錢三百千文作充修脯仍責令監學逐月查報是否認真並飭仍照高等小學堂按日記註月報查考以驗勤惰總不令師曠厥館生懈於學而宏造就通計小蒙各學堂共支銀六百五十四兩共支錢四百一十六千文除將籃草所收全支外計尙不敷錢五十四千文自應易錢換發約合銀四十兩上下收除兩抵每年雖可節

存銀二百三十一兩然無定之支每年尙有赴省游學火食以及歲修學堂等項每年實能存銀數拾兩如銷情或絀則收數自少所存卽屬無多况小蒙各學應需書目甚夥現在堂內存書尙十欠其八除前年奉發欸銀百兩發紳擇要購書外並由卑職自行捐廉購送學堂九通等書共百拾餘種聊備考查然規模僅能粗具其應需書目尙未大備擬卽將此遞年積存飭紳妥慎經營按年陸續添購中西政治博物格致圖算測繪各種書籍算學各種儀器以宏學識而資考證一俟書籍購辦就緒再將飭存款項添設初等小蒙學堂切實擴充以仰副

續修白鹽井志

卷八上藝文志

詳議

四十五

憲台興學育才之至意等因稟奉

各大憲批准立案飭遵在案

續擬籌辦高等兩等小學堂事

提舉

文源

窃維立國之本首重興學而授學之規發乎蒙養俾將來遞升高大學堂乃能直接以合程度卑井學堂自光緒三十年將白井向有之龍吟書院合併算學遵章改辦高等小學堂復於三十一年將原有卷金等欸查明節提擴充學生名額並將井地所設蒙學五堂及卑職籌欸生息添設一堂改辦官立初等小學共成六堂所有改辦情形先後稟蒙

各大憲批准立案在案溯自開辦以來經卑職倡率各教員遵章習授諸生學業頗增進境嗣因奉文飭令申送法政師範陸軍體操警查蠶桑諸實業而井地彈丸有志於學者向不多覲仍須取材學堂乃望學業有成送省後應另選取如額俾資作育第原定中西教員修脯殊不豐腆而教習至重亦非泛泛者所可濫竽井地學紳中一時又無其人堪膺斯選卽經卑職酌議併中算爲一席原其修資飭據井紳趙錫璋等由省延聘程度較高師範就便稟請扎委來井啟迪一面將高等學生二十六名如額取足專候教員委派至井卽行照章開辦至於初等小蒙各學

續修白鹽井志

卷八上藝文志

詳議

四十六

爲教育國民始基更宜亟時培養今春適值在省學生舉人趙錫璋張之霖甘綸等由省請假在籍卑職與之反覆籌商興辦教育演說等會以開民智併辦兩等學堂以資發達除高等小學堂應俟教員到時遵照

欽定及加定學規辦理毋庸紛更外乃將向設之監學改爲校長管理學堂一應事務兼編定堂內教科書籍之責每月致送薪水銀六兩並將原設管事改爲書記管理學堂簿書仍兼五井兩等學堂簿籍月支新水銀二兩又以體操專修科畢業回井之生專教體操唱歌仍兼教習五井兩等小學堂體操唱歌職務月送束修銀四兩查定章烟戶

二百家卽應設初等小學堂一所白井烟戶在八百以上內分觀舊喬界尾五井統計童蒙二三百名除向設官立初等小學六堂外民立者亦在十數堂之多雖經卑職提倡督教不遺餘力在官立者尙能開通若民立各堂多墨守舊習一成不變非不樂於維新實緣井地褊小囿於見聞修脯無多書籍未備不明新學從何發達卑職再四籌思若不設法改良於學界終無起色乃與各紳酌議將官立民立蒙小各堂併爲公立兩等小學五大堂每井於適中之地各設一堂無論何等子弟均令送入附近之堂受學每堂定爲四級內分高等初級次級初等初級次級高

續修白鹽井志

卷八上藝文志

詳議

四十七

等以文理清通者爲初級文理雖未通而能講解四書者爲次級初等以讀過三經以上爲初級發蒙在兩年以內爲次級按等分級以置教員學生足二十名卽置教員一人聽學生多寡以增減教員俾招周密第教員本應以畢業師範膺其選今改良伊始難求全備祇能權由井地宿儒添資選充嗣後有所辭退則概以本井高等畢業生充補所有束修每教員一人年送銀四十兩現係官民通力合作若專注官費力實未逮茲擬每堂籌發官費銀三十兩餘由學生分攤學費卽最高程度年亦不得過銀二兩以廣招徠再有不敷由竈公籌補又每堂由官費內招襍

役一名以供使令月支銀壹兩五錢該五堂共設校長一員稽查師生曠悞學業編定分配教科等書月送薪水銀六兩其堂內應用書籍以及上學鐘點均遵

學務處編審酌定者以爲指歸由卑職採買分發以免歧誤定議後卽經卑職分別照會委辦並出示曉諭凡有子弟之家立赴校長處報名聽候查其年格指入就近學堂上學隨據彙冊報查通計五井五堂共有學生二百七十八人分隸教習一十七員統於二月初一日一律開學重在師範得人由卑職隨時考察惰悞者黜退勤奮者獎勵每星期放學一次總使地無不學之戶家無不學之人以

續修白鹽井志

卷八上藝文志

詳議

四十八

仰副

憲台興學育材之至意至於每年入款原有一分膏火並原籌算學經費以及籃草錢文租息共收銀一千零五十五兩出款除正腊放學外年以十個月計算高等小學教員由省聘來年致束修火食夫馬約銀三百兩高等初等兩校長年共銀一百二十兩高等學生二十六名火食銀三百九十兩體搯教員銀四十兩書計銀二十兩高等堂役一名銀二十兩茶炭需星銀三十兩五井兩等學堂年各銀三十兩共一百五十兩五堂襍役五名年共銀七十五兩有定之款年共銀一千一百四十五兩加以購買書

籍儀器原擬提銀一百兩法政學紳一名年合銀九十六兩體搽學生一名四十八兩統共支銀一千三百八十九兩計不敷銀三百三十四兩擬由修橋路十文項下年再提銀一百兩及遵奉學務處札奉

督憲批據舉人趙錫璋等請提米油酒行並設平稱抽費添辦學堂等因到井卑職集紳議覆以米油酒行收數太少且目前百物昂貴應置後圖請設公平入款收錢一文發款收錢二文年約收銀二百五十餘兩兩抵尙能畧有餘裕但已定支款固有如許之多無定開支有未能預計者如津貼送省遊學生公費及歲修等款若相併計不敷

續修白鹽井志

卷八上藝文志

詳議

四十九

尙多則惟有由卑職寬籌節用一應款項務歸核實免滋糜費所有卑職續籌款項改辦兩等學堂各緣由是否有當理合肅具蕪稟仰祈

憲台俯賜查核立案示遵辦理等情稟奉

各大憲批准立案在案

請修復靈源書院以備啟辦中學堂等事

節錄

提舉

文源

竊查卑井舊有靈源書院在巒宮之傍山環水抱規模闕敞當時人文蔚起咸謂斯院所鍾咸豐末年燬於兵燹無力重修卑職到任時思規復以籌款不易中輟現時龍吟

書院本借廢署而成局度狹小頗形蹉跎前者改辦學堂僅能因陋就簡徐圖改觀三十二年適有路費之加未加之前銷情異常踴躍三十一年秋商人聞風僭運殊有應接不遑之勢正躊躇間適據舉人王守道等稟稱議修靈源書院籌欸既難茲值銷情大暢商人爭銷配鹽稍不停勻卽肇爭端與井商酌議除現脚卽時配發外凡井商囤售之鹽與其徒飽腹賈之私而爭多恐少曷若議飭量捐修費而均勻配發庶靈源舊院有修復之機籌設中學亦不致十分爲難事旣因公羣情稱善通共捐集銀一千三百餘兩懇請籌添飭委勘修等情據此卑職覆查此欸雖

續修白鹽井志

卷八上藝文志

詳議

五十

名商捐實因鹽情踴躍商人取償於眾實仍出之於鹽於公私毫無妨碍當飭招匠估勘應需泥木工料銀二千餘金計尙不敷銀八百餘金除將現存卷金學產共銀五百餘金添修外不敷仍鉅擬由盤關十文存欸項下提錢合銀動用以足其數茲擇於光緒三十二年二月興工一俟落成卽行啟辦中學堂以宏作育等因稟奉各大憲批准立案飭遵在案

修復養濟院稟請大憲立案

提舉

文源

竊查卑井產鹽而外絕少生業民情游惰貧乏居多除每年請領正外孤貧外復由卑職捐廉添設二十名第無棲

流專所散處破廟岩穴或寄居慶井礮硿夏秋受濕冬春受凍傷亡既多情殊可憫卑職每以負疚嗣訪之耆老知原有養濟院在竈戶冲湮沒已百有餘年遺趾僅存當飭鹽大使職銜王乃欽跣勘修復起蓋平瓦房六間四圍羣牆大門內以四間爲男院以二間爲女院分門別戶估需工料銀二百兩卽飭開工擬仍由收存廟宇橋路十文頭項下動提修復工竣懇免委驗造報以仰副  
憲台一視同仁之至意是否有當理合再肅蕪稟稟祈  
憲台俯賜衡核立案示遵等因稟奉  
各大憲批准立案飭遵

續修白鹽井志

卷八上藝文志

詳議

五十一

收養孤貧等事

提舉

文源

照得趙戶冲原有養濟院一區湮沒百有餘年遺趾僅存業經本井司籌款修復收養無告現在業已落成凡屬老幼殘廢鰥寡孤獨均准入院住宿以免風餐露處致罹橫折除出示定章永遠遵守外自應責成兩鄉約按月輪流經管合亟諭飭爲此諭仰該井約卽便遵照定章認真經管凡住院孤貧人等務須時加約束使其各安本分不准以強凌弱聚賭鬪毆窩留匪類鼠竊狗偷男女有別須令隔院而居愛惜房屋不容糟蹋折毀男女兩院着令各舉頭目經理一切每日輪派二人打掃務令潔淨以免穢氣

薰蒸致生疾病街頭若有無告窮民不論老幼卽由該約指令住宿其中不使露宿致斃倘有不遵約束違犯定章恃強估霸行同敗類刻卽驅逐出境不准逗遛在井以免別滋事端切宜凜遵慎勿稍涉玩忽自取罪戾仍分別住院久暫以及人數多寡隨時開報查考切切特諭

設警察等事

節錄

提舉文源

窃卑職於光緒三十三年二月二十三日奉團練處札開光緒三十二年十二月十九日奉

督部堂丁 批本處會同警察局呈詳滇省各屬團哨改爲警察詳請示遵一案奉批如詳辦理仰卽通飭遵辦暨

續修白鹽井志

卷八上藝文志

詳議

五二

候

奏咨至所募巡警務飭明白示諭各班團丁有負軍人之至願畧知警察之義務者出具願書自行報名聽候按格選充以洗從前挑團攤派雇替積弊倘仍勒派卽行嚴究是爲尤要此 等因刊刷原詳請單札飭到井奉此案查上年遵奉

憲札飭將常留團兵二十名一律改爲警察並飭遴選紳團送入警察學堂肄習卒業回充巡目在案茲查奉發原詳內載各屬警察分爲頭二三四四等白井列爲三等設警兵三十名三等屬應設巡長一員月支薪水銀十三兩

五錢外加公費銀一兩五錢副巡長一員月支薪水銀六兩加給公費銀六錢每巡警十名准設巡目一名月支餉銀三兩六錢公費銀三錢巡警九名月各支餉銀三兩公費銀三錢遇閏照加所給巡目巡警公費按月扣存以作操衣帽並紙筆費用計三等屬月支薪餉銀一百二十二兩四錢年需銀一千四百六十八兩八錢自應遵章改辦查巡長副長雖應由學堂卒業員生選充現在卑職送省肄習諸生尙未卒業自應權宜選充統俟警察學生卒業回籍再行查看另委當於本井原操團內招選年壯力強識字耐勞團兵四十名問明愿充巡警飭各出具愿結併

續修白鹽井志

卷八上藝文志

詳議

五十三

同原充警兵二十名躬親挑選汰去疲弱取足三十名於三月初一日開辦交由巡長照章督帶捺練演習以盡警察義務遺丁存記留備年滿更換一半之選其每年應需薪餉銀一千四百六十八兩八錢仍由井地不在正額另銷兵費倉支鹽斥所抽團費數內坐支餘仍報解以符原案等情稟奉  
各大憲批准照辦在案

會議請加鹽捐團費事

司道會議

照得本司道會議詳奉

撫憲批示據三也紳士丁槐陳榮昌馬柱劉藜光解聯科朱廷珍李章王玉麟李鍾宸等具稟擬於食鹽內由花戶每觔捐錢拾文以充通省團練經費緣由擬請如稟照准卽自光緒二十六年九月起按鹽由井收捐詳請立案通行飭遵一案除俟奉批另札飭遵并分移通行外合亟抄錄原詳及刊刷告示札發爲此札仰該井卽便遵照詳內事宜督飭所屬司事及商竈人等起限經收認真辦理并先將發來告示分發實貼曉諭仍將奉札遵辦緣由日期續修白鹽井志

卷八上藝文志

詳議

五十四

廩報查核勿稍違延切速特札鈔詳備載案冊

興辦滇蜀鐵路集股等事

節錄

雲貴總督丁振鐸

奏請自辦滇蜀鐵路集股章程一摺光緒三十一年七月

二十三日准

兵部火票遞回原摺奉

硃批外務部商部知道片單併發欽此查此次自辦滇蜀鐵路

既經奏奉

諭旨允准自應欽遵定期開辦行司移道轉飭遵照章程所載各節辦理其鹽每觔加價五文隨糧每升收錢二文均定於三十二年正月開辦併由該司道等先行撰擬告示遍發曉諭俾眾周知等因奉此查滇蜀鐵路集股章程內載

續修白鹽井志

卷八上藝文志

詳請

五十五

鹽捐辦法以滇省辦團練按鹽觔加價由鹽官收解之法最爲平允不至銷屑擾民前辦團按鹽每觔加十文歲得五十餘萬兩作爲民捐現擬專爲鐵路籌款每觔酌加五文歲亦可得二十餘萬兩其辦法卽查照鹽捐團費之例由鹽官收解至路成之日則此鐵路款項每觔五文之鹽捐永遠停止鹽官於始收之時卽以示民用昭大信又此項鹽捐仍照團費章程作爲民捐填給股票公議一存票處所路未成不計息路成之後所得息銀紅利專辦通省民間公益之事各等語自應查照定章每銷鹽百觔加收鐵路經費錢五百文仍照鹽捐團費之例折征庫平銀五

錢由井員經收彙數報解以供鐵路要需

續修白鹽井志

卷八上藝文志

詳議

五六

案冊白鹽井提舉向只專管白井轄白井大使一員喬後麗喇雲龍等井鹽務隸各該大使經管光緒十四十五十七等年先後詳奏將喬後麗江喇雞雲龍等井鹽務歸併提舉統征報解連白井一手經理麗江雲龍兩大使改隸提舉管轄自此以後各大使只有催驗查緝之責征解盈虧無與焉

案冊滇省鹽務自咸豐兵燹後西南諸井各分畛域相率減價加稱以圖充銷後遂有歸併之議然磨按諸井每百觔有加至六七十觔者光緒二十一年鹽法道普津詳委知府興祿提舉鄒馨德等分赴各井會同井員查續修白鹽井志

卷八上藝文志詳議五十七

明年銷數目辦理節稱提價每百觔只准加至二十八觔此外餘鹽悉令提出征課報解

序 藝文志之五

重建白蓮寺序

進士 楊 燦

石羊之西爲一關關外有古刹一名妙華又一名曰白蓮其寺有前殿舊供一大士又有大殿舊供三大士殿之左有三皇宮宮之前又有三元宮餘則爲齋堂爲僧舍與廊廡山門而已迺此寺建於明之嘉靖己未年爲五井香火寺之山龍又爲鹺司來脉邇延野綠遠涵天碧眾山來朝勢若星拱正石羊一大扼要也歲久年深此寺傾圮異常花宮佛像幾委沒於荒烟蔓草之中使非有發大悲願運金剛力不能因此寺之頹而復興興而可久者也一日者

續修白鹽井志

卷八上藝文志

序

五十八

楊公登臨其上目擊而心惻焉惻之而既謀所以興之爲問昔人之建大殿者規制何幽以闇也爲問昔人之建前殿者體局何卑以陋也爲問三皇宮何以湫隘三元宮何以偪仄也今欲拓其規模重新廟貌所費材料幾何丹牘金碧幾何一一與五井人士謀定而興工焉先捐己貲後勸樂助鳩工於戊午之春正告成於是年之夏月是役也經營匠心子來趨事不傷財不病民易幽闇而高明今日始見莊嚴矣易卑陋而宏敞今日始遊寬大矣兩宮一新各殿輝煌今日始慶重光矣而且奉三大士於香臺奉三世佛於法界今日始有定位矣增古鼎以隆蓮座置常住

以永香火選戒行以勤焚修將鐘磬與梵音俱遠香刹偕日月攸長凡此者皆我公之布金白蓮種福石羊者也聞公諱光遠號蒼水浙江麗水縣人由戊子科拔貢自公司齋裕國而外綢繆保障美績莫能罄書其所以彰著於朝野間者亦既鐫諸各碑記矣此不贅也是爲序

### 重修孔仙橋序

白井  
提舉 劉邦瑞

古者辰角見而除道天根見而成梁故司空視塗利涉爲急典綦重矣孔仙橋離井六十里左界姚州右達雲南縣爲西迤四郡十數邑運鹽之通衢而商販出入之孔道也粵稽寶關闢路而葦縷漸除欹險漸治如三岔營青香樹

### 續修白鹽井志

### 卷八上藝文志

序 五十九

半個山無底箐等處今皆平治可行矣獨是界以大河匪橋莫濟相傳有孔姓者相河流形勢纍以巨木疊以長枋厥功頗著故名孔仙後之繼者漸次易石蟠其根而固其梁規模較前稍定焉然水勢洶湧旋修旋圯更多大石塞流壅岸人力難施自道人袁見空結茅山巔苦募籌畫乃先鳩眾合力以驅磐石次第經營以告成功至今鄉耆野老尙能述道人之奇踪異跡驚嘆無休但根基雖奠橋工雖成每遇山水瀑漲不無冲突之憂故於庚子年之秋冲去一控費銀二千餘金方始修復昨於己酉夏間又值水泛冲决橋首半控往來者凜凜冰淵是以詳請各 上憲

裁酌修理蒙鹽憲批准估建乃廣集木石給餉募工決沒者經始之倒塌者建置之欹傾者砥定之闕略者補葺之而橋已復故矣然予更有慮焉者橋屬西迤運鹽要路凡自井來者或背負肩挑或牛車馬載必暫停橋上以俟盤驗放行當其晴明勿論矣若遇雨水時鹽積道旁不無浸濕流溢甚而雨大則遍地淋漓以致虧本缺額此情將安訢耶今於橋頭構屋三楹以爲停鹽之所庶幾風雨無患更設柵欄一座晨開暮閉俾私鹽無從飛越卽以關欄爲扼要焉蓋自孔姓肇造以來道人重建而後屢次加修今可恃以持久矣而構屋設欄是又前人未備之規模於茲續修白鹽井志

卷八上藝文志

序

六十

全備凡此皆仰體各上憲利濟惠民之德意以變通其間者至於伐木採石無冒支計值給價無濫費斧斤鑿削無作輟風雨晦明無曠時則又庶民子來羣工慕義職事者亦實心不苟所爲故材省功多而成之最速也余何力之有焉因序其始末如此

來蘓閣序

劉邦瑞

來蘓閣者爲原任貴州布政使司遲公於先在滇省佐郡時上憲悉其才足兼方委攝白井鹽篆不以五日京兆自視凡利所當興弊所當革毅然身任而力行之撫育竈民綏來商販優優其政洽於人心未幾而受代將行士竈無

計攀留共建生祠肖公像以崇奉之此來蘓閣所由名也  
追溯其時屆今幾四十載每於月之朔望以及佳辰令節  
竈民無不詣祠焚香以致思慕感戴之忱亦可想見我公  
昔年之偉蹟矣今庚戌春井民聞公捐館之信相率而哭  
於祠因見閣將傾圮共謀重建以妥公靈於是鳩工庀材  
就其舊址而高大之黝堊丹漆備極壯麗供具皆完好閱  
月而告成演戲設祭者三日予亦從眾而往奠之目擊竈  
戶街民哀感之誠實由素心非可強而致也因慨夫士君  
子之處世其得於天而重於人者莫如洪範所謂富貴壽  
考然此四者皆天之所畀而人之所難兼也設有倖而致

續修白鹽井志

卷八上藝文志

序

六十一

之蓋其得於天者厚也得於天者厚而若人焉工業不足  
以致君德澤不足以覆物令聞不譽於當時聲稱不垂於  
後世是僅能得於天而不能盡乎人生無益於世死無損  
於時雖富貴壽考猶朝露也一旦捐賓客而去誰復有悲  
號奔走如喪考妣哀悼之獨切思慕之不忘如我遲公者  
耶公筮仕始自錢塘以卓異遷粵西永甯州刺史秩滿除  
永昌郡二守隨權白鹽井事通商郵竈利若湧泉繼則典  
郡曲陽吏畏其威民懷其惠 朝廷知公廉幹令督兩  
淮鹽務風清弊絕課足於公嗣是而提刑湖北豸豸回春  
宣化夜郎民無菜色諸艱歷試多年厚德宏施列國位登

方伯壽近期頤此得於天者固厚而盡乎人者亦深矣此蓋公以致君之志動物之誠放諸四海而準故人之感之也深天亦畀以富貴壽考至此極也今白井士竈重建祠堂以崇祀公靈是豈區區富貴利達以銜耀於須臾要名譽於一時者可同焉而語哉是爲序

一滴庵序

失名

環井皆山也自西南來去井三十里許有黎武之山巔坡坎高大難以數武而登實係咽喉之地又無憩飲之處乃官商士庶往來必由之所運水於十里之遙建此一庵名曰一滴大殿兩廊過道山門茶房俱備招僧運水以濟涸

續修白鹽井志

卷八上藝文志

序

六十二

轍誠哉一滴真甘露也但飲斯水者可不思其源乎考其庵之源建自何年乃崇禎己酉歲也抑建自何人前司父母官王公諱文瓊也然有寺不可無僧有僧不可無食所

置有常住田在大橋薛家山長冲鍋廠等處約共四十餘石皆公之自捐已祿買置者半眾人之欣然好善慨然施入者半庵之得以永保無虞豈料世遠年湮被附近村豪擊碎石碑隱藏不露伙黨乘機霸佔田地累僧賠糧以致寺倒僧逃幾廢前功矣蒙署司遲府大老爺發心重修雖招僧住持而田糧未清仍蹈前轍又幾廢矣於康熙四十年鄭大老爺任內令五井士竈招僧寂威住持業已呈

明蒙給執照告示飭令修葺寺院改舊更新清理田糧侍奉香火其有霸佔情弊呈明審時供招在案既已詳府批縣矣尙未勒石以垂永久今蒙懇司主劉大老爺勒之金石載之志書庶庵院免至傾頽往來不失憩飲香火得以悠久非菩薩之感應曷克臻此哉後之人登斯山飲斯水方知王公祖創之於始遲公祖重修於後鄭公祖改舊更新劉公祖顏其對匾勒石於終數公祖之恩同再造士民之頂祝無涯矣是爲之序

白鹽井舊志序

劉邦瑞

大司徒版圖所隸逮及要荒職方氏疆宇所區詳於州里

續修白鹽井志

卷八上藝文志

序

六十三

故軒輶之使採擇無遺而文獻之徵敷陳攸係邑之有志由來尙矣白井從無志書其附於姚郡者不過寥寥數行通志所錄則又什之一耳予承乏茲土卽慨然有稽文訪獻之思而斷碣殘碑已消磨於荒烟蔓草蓋不勝望古興懷焉然職專鹺務一切通商裕課鞅掌不遑而厚生正德之謨又復多所籌畫朝夕乾惕惟期勤職業以報朝廷竭心力以體各憲施政教以育竈民而文獻之思不暇及矣數年來政稍就理覺山川人物間漸有起色獨井志闕如詎非有司之耻况滇省鹽井頗多必以黑白琅三井爲首而白井肇於漢盛於唐尙在黑琅二井之先源深而

澤長今二井有志白井獨無不幾缺典乎乃復慨然思曰志必沿舊前人之志將何所始耶白井雖文獻失徵而山川形勢遥遥在望也井竈戶口厯厯可考也學校公署巍然大觀廟宇關梁煥然一新也以至官司有職掌課賦有科條土物有攸宜風俗有異尙人材濟濟而文物彬彬也凡此皆目見耳聞可以登之井志者即使稽文訪獻無越乎此又何不可自我而始耶乃簿書之暇正擬蒐羅適逢上憲留心地方檄行各郡邑詳修志書以宏觀覽予奉檄欣然獲與素心符合而井治貢生陳子廷佐者手持草本謁予點竄豈其稽文訪獻固有同心耶及展閱而條理欠

續修白鹽井志

卷八上藝文志

序

六十四

清比事屬詞中未免膚廓蓋傳聞雜記非協於體裁者予爲之舉其大綱張其節目條分縷析先後秩然更延儒宿共相討論而後繁者修簡者餽班班然潤色成編則陳子之草本就裁而予之素心得慰矣雖然志非徒誇一邑之盛也我朝統一區夏合中外千百國而臣僕之幅幘之廣自唐虞二代以來皆莫能及方今

聖天子德威所至凡有血氣莫不尊親溘處天末而雕題窮髮之地烏巢兔窟之倫俱已傾心向化况白井久隸職方有不風移俗易者哉然則斯志之成也先分地理次別建設序秩官而稽賦役詳人物而核藝文白井一方燎然指掌

非若前之附於姚郡者寥寥莫考也他日 上憲鼓吹文明將合郡志而纂修通志或有所採擇有以大國家一統之盛者其亦不無小補云雍正八年白鹽井鹽課提舉司襄平劉邦瑞元臣氏序

重修白鹽井志序

郭存莊

志乘之作仿於班氏地理志凡一方之分野沿革山川建置戶口風物官師鄉賢文藝之屬靡不畢載故必事求真實言取雅馴而後足以信今而傳後井舊無志雍正八年提舉劉公邦瑞因貢生陳廷佐稟本成志四卷分類彙事述古紀今其於井地之故實亦既綱舉目張班班可考矣

續修白鹽井志

卷八上藝文志

序

六十五

第閱今三十年恭逢

聖天子重熙累洽之時禮明樂備一道同風井雖僻地鄙野者日化於文苟略者漸臻乎備疆域仍是也而戶口日增山川依舊也而建置益廣井滷之出有時也而封者復啟鹽賦之供維常也而歲額日益昔之學校因仍而襲故今則體制詳備矣昔之人才偶見而一出今則後先輝映矣鹽政之損益幾何事職官之善治幾何人因革損益勢異事殊則修志之舉弗可緩已余以甲戌歲自西平牧遷今職來司此土方且圖所以報稱 國恩者於時設社倉以養民興書院以教士嚴關隘以緝奸修道路以便行汲汲皇

皇廢墜是舉志之欲修時有不逮丁丑春聞前順甯教授趙州進士趙君澶者力學好古曩曾分修滇志爰聘主龍吟書院且以井志謀輯焉而其時君之小阮聯映暨武陵胡君蔚又先後適至於商確再三相與考疑信正體裁或刪煩就簡或補闕摭遺爲類二十各弁以序而總以鹽務爲要良以有井之原委建置斯有井之戶口人民設官分職所以調劑鹺政之興除建學選造所以鼓舞井地之髦秀壇壝祠廟祀事孔修節義文章光輝亟表至於鹽賦之酌盈劑虛所以恤竈惠商安上而全下者則有各 大憲之鴻猷碩畫善後宜今余敢不拳拳焉奉宣德意以子續修白鹽井志

卷八上藝文志

序

六十六

惠黎元也是志之修雖不敢曰言必雅馴而庶幾事存眞實用以襄

同文之治備採擇之資云爾皆乾隆二十三年雲南直隸白

鹽井鹽課提舉司提舉汶上郭存莊謹撰

重修白鹽井志序

藩憲

傅

靖介亭

乾隆丁丑冬余蒞任滇藩凡郡邑之輿圖志乘皆得次第披閱滇雖邊徼文物聲名寔與中州相埒蓋 國家仁漸義摩無遠弗届悉舉阻深幽昧之域而章明和會之猗歟盛矣顧周覽之餘未盡愜意其間多閱年所不無闕略或有待繼起之增潤然簿書鞅掌案牘勞形修明之任司牧

事者恒難之乃提舉郭公於白井一志獨能緝舊增新編成授梓是可嘉也夫事不患其弗成患其不爲因循相沿曷由振就湮之遺緒廓待理之宏規而志其一端耳郭公典領鹵務奉職勤勩所經畫皆井井有條爰以得諸實據者摺摭而釐訂之豈以誇一方掌故也哉蓋素藩其井徭里俗沿革張弛之宜而深虞夫代遠年湮漉漫散佚之易步休烈於曩哲貽矩式于來茲旣以昭 聖朝聲教暨訖之隆復以見邊隅風移俗易之效使鏡古者一展卷而燦然列眉固非徒紙上之繪圖傳舍之虛冊也百爾君子得此意而深之庶乎其無忝厥職矣因輟數語以弁其端

續修白鹽井志

卷八上藝文志序

六十七

云

重修白鹽井志序

乾隆二十三年

雲南撫憲 劉

藻 荷澤

白井昔無志前提舉劉君邦瑞因明經陳廷佐舊本詮次爲四卷事蹟粗備閱今三十載時殊事異前志所載蓋有不足徵者矣今提舉郭君取而重修之刪繁飾簡詳核有法書成問序於余余惟志乘之作所以信一時而傳後世歲久弗葺則因革損益之故或湮沒而莫可稽考良有司多留意及此顧或者於職分內所當爲之事忽焉不講而徒沾沾於侈文考獻以塗飾治具抑末也郭君視事數載百廢具舉凡所施設皆有實效而又以其餘暇勒成是書

可謂知所先後者矣余既嘉君之勤而并以見 國家典章文物之盛雖邊方斥鹵之區亦駸駸乎與中原美富比烈故樂爲之序而歸之

重修白鹽井志跋

乾隆二十三年

進士 趙

涇州人

志乘之法經經而緯史或卽事以敷陳或因端而納誨雖紀事也而善善惡惡勸懲之意卽寓其中苟徒事鋪張浮夸是逞無論不可以傳後先已不足以信今是故余曩修通志恒慎重之留局至閱三載今已年逾七十精力衰謝而齟司郭公潔己愛人興學重道以虛名聘掌龍吟書院館事粗畢輒以重修井志勉留夫修志固予已試事也而

續修白鹽井志

卷八上藝文志

序

六十八

白井之志有不同者蓋其地以鹽名學以鹽開凡茲一切興建文物之得比於州郡者皆以鹽故而旁流上達則鹽政因革損益所關於吏治民生者誠不可以苟焉而已夫白井開於漢益於唐其始不過聽民自煎收其歲入而已至明而乃漸增迨本 朝而遂以數百萬計母以天壤山澤之利有漸恢漸闢而至於極盛者與抑物華天寶人傑地靈有不可遏抑者也雖然漢唐已安已治而識者早有保泰持盈之論況今

聖天子子惠困窮湛恩汪濊偶遭災荒賑恤惟恐不及推斯志也則窮簷編竈詎無有一夫不獲之憂而待紳士之入告

官司之曲體者所恃疾苦時陳如李沆爲民請命如希憲以桑孔爲前車則留也人歌樂只去也戶頌甘棠易所謂損上益下民說無疆者也井地將益阜安科第將益蟬聯立德立功立言均足不朽於志乘矣是爲序

捐送卷金序

道光二十五年

訓導

朱

峴

通海縣人

白井素稱富饒要皆以滷爲業而無滷之家亦所時有余自蒞任以來見歲科兩試及鄉試有因資斧不易阻其進取之志者深爲惋惜因思有以助之爰分清俸捐金一百當同紳士授竈生息計每年息銀十八金三年有息銀五十四金鄉試之年除送幫費銀二兩及僱門斗抬牌外餘

續修白鹽井志

卷八上藝文志

序

六十九

照赴科士子人數均分雖小惠未徧亦未必無小補云此邦人士聞風而起慨然捐助俾寒畯咸得資以奪魁將春蠶食葉羣材之鵠起益多秋隼摩空比歲之鹿鳴更盛是則余之所深望也夫

倉聖會序

道光元年

白井訓導

郭治國

蓋聞羲造書契後世之篆隸實祖之至哉 聖人大開千萬世文明之運也後之儒者追溯 聖賢創造非字學無由垂千古亦非字學無由法千古是以歷代崇祀之典亦重矣考白井嘉慶拾陸年新建 倉聖閣已見多士飲水思源之意數年以來俾新生得與於祭蓋所以示學

者共相鼓勵也第恐歷年久遠人心懈怠祀典廢弛未免失鄉先達崇祀至意今幸 牛學院科歲所入文武新生等踴躍爭先量力捐助以作後來祀典之需俾世世繼承不替誠美舉也余是以樂而爲之序

王培潤勸孝詩跋

舉人 毛德輝 圭山

昔人謂眞事業從五倫做出大文章自六經得來旨哉言乎叔季不講此久矣學者逐末而忘本不學者見利而遺義惟深識者懼正學將湮而人心日晦也培潤王公以聖賢維世之意爲斯人作迷津之航發揮愛敬直提良心讀之令人通身汗下因思人心同然公眞得我心者哉

續修白鹽井志

卷八上藝文志

序 七十

丙午歲白井水災序

道光二十七年

提舉

李承基

貴州人

古之所謂天災流行國家代有故旱澇水火無世無之此殆劫運所遭抑亦數之使然歟不然何其猝發而莫之遏也白井界在迤西粵稽往古自唐開闢延及明季將近千年洪水爲災漂沒人民無算識者委之於劫數然歟否歟自明末迄今二百餘年本 朝太平日久斯民無汜濫之虞方謂安瀾有慶常隸舜日堯天無何劫數交加丙午歲六月間連日大雨迨二十五日初更之後山溪暴漲澎湃汪洋五井民房竈房大釜柴薪盡入澤國橋梁十餘座悉被水冲廟宇七八處半多坍塌本司衙署水與簷齊白頭

二門至大堂二堂花廳厨房兵練書差各舍共七十餘間以及照牆垣墉罔不傾圮惟上房三間地勢微高僅淹四尺餘幸有樓可棲本衙老釋藉以安身至於文案稿卷半入凋殘泊存倉鹽玖拾餘萬觔悉歸烏有淤填鹵井四十一口墮煎鹽貳百餘萬觔水勢稍退予急捐錢三十餘千先行賑濟一面星飛申聞 上臺蒙 奏請借銀貳萬貳千兩飭竈戶具領修復其墮煎鹽觔分作三年帶征解繳其借項亦分限三年加解歸款外先蒙 委員履勘隨攜銀壹千兩到井散放不敷予又借墊銀一百九十八兩零湊足賑濟凡災民四千三百四十四丁口而常平社倉各

續修白鹽井志

卷八上藝文志

序

七十一

穀壹千伍百餘石亦多湫濕霉變間有未浸水之常平穀叁百貳拾叁石予惟恫瘝在抱悉將分濟災民倉既空虛又復申明各 憲獨任捐廉買補還倉結報在案惟傾汜司署工資浩大無款可籌因詳請借支養廉尙待批允是以借墊銀兩先行修復完固至於司署一切牆垣向無石脚一經水淹悉皆坍塌經今新修各牆俱用大石高砌二三尺庶使牆基堅固其照牆俱用條石封砌以期久遠嗟嗟劫之與數相因而至人焉得先知而避之避之不能爲制置者得不多方急救以甦斯民之困乎今逾年大工告竣其被災情形予與羣黎罹茲慘酷言之可爲寒心也

是爲序

辛未歲重修衙署序

同治十年

白井金

銑 皖北

天下事有愈變而愈奇者卽有一成而不易者剝極而復夫然後長治而久安白井提舉衙署大堂五楹雖非理民聽訟之所而課稅於此籌輸商販於此瞻仰二門居中六房對峙其舊制冠冕堂皇有自來矣自咸豐己未年雲縣姚州相繼失守致令精華重地爲髮逆竊踞十年有餘雖官兵屢次克復而旋得旋失鮮有成功至同治己巳年楊提軍督率勁旅掃盜賊巢收復井地姚州大姚一律肅清惟人民凋敝房屋傾頽迥非往時局面課薪諸務又歸

續修白鹽井志

卷八上藝文志

序

七十二

軍營辦理戎馬往來之際未暇及他本井司奉檄來茲恰值兵燹甫經隨在不堪觸目况辛未五月河水暴漲署中房屋復被水淹司其事者甚不忍因陋就簡而不思起而振作之也適

張岑

兩觀察同臨井地清核舊款井責有

撫憲札示俾課薪事件仍照舊章歸提舉司經理本井司以艱鉅猝投調劑不易因傳集紳士竈商同幕僚加意斟酌勉欲相符舊制現今銷路雖不暢通而一切應辦事宜遂覺粗有條理而署中房屋尙多傾欹倘不急爲補葺必有坍塌之虞將何以重 朝廷而肅體統乎爰申詳 上憲幸蒙嘉允准向井地籌款培修謹於十月初二日擇吉

動土鳩工庀材不自暇逸越兩月告成不事丹楹刻桷而  
規模煥然一新行見井豐竈旺課裕商通百廢俱興一勞  
永逸非僅本井司之厚望已也是爲序

續修白鹽井志

卷八上藝文志

序

七十三

阿拜井畧

失名

劉邦瑞井志東北十里有阿拜小井在河之沙洲天順八年暨宏治正德間鹽壅課逋追呼幾至生變嘉靖十八年閉二十五年知府趙澍欲開當道者阻之三十一一年復開因課逋竈逃仍閉後至萬曆二十七年間旋開旋閉監察御史劉鼎會勒石阿拜小井係白井源頭永遠封閉不許擅開四十一年楚雄何通判來署井篆議開不果舊志云山麓有河其沙洲之上滷水湧出不假竿繩引手可汲且地近林木薪價低平較大井事省而利倍自議封閉滷水

續修白鹽井志

卷八上藝文志

雜著

七十四

散漫同河水概流是以天地自然之利而棄之也今欲令大井之人開煮非大井者不能爭其利庶鹽利通行國課易完兩有攸賴等語及查鹽政考論曰川澤之利此盈彼絀藉令今日開一井明日又開一井民愈困而鹽愈壅滷愈多而課愈欠况膏脉有盡民欲無窮但知開之所以利之而不知閉之亦所以利之也故諸井惟仍其舊而止

沙井畧

其所謂沙井者乃河邊沙地至冬春二季天氣清明掘開沙渚其水畧有鹹味該井各竈戶輪流汲取以助額滷之什一迨夏秋之交陰雨連綿河水泛漲盡行淹沒必俟雨

霽水消乃能淘出蓋可暫而不可久者也 井舊志

### 威雄土主靈應頌

久自榮

伏以 神威有赫靈應無私除一方之災障造五井之福  
基原夫德鎮中央體廣大資生之撰威昭巖郡作聰明正  
直之司 勅封肇自前代異蹟著於江涯洞庭不波巖使  
欣逢利濟香水安堵生靈得免淪危黎武坡前現旌旗以  
示異森羅殿上掛佩劍而難欺遂使僞軍稽首不能肆惡  
逞梟流寇還戈就此聞名散黨井名節井俯全烈婦清操  
臺號膽臺照破奸頑意像深宵火熾隨滅息而弗虞巡役  
刀傷經明訊以無枉假公肥己顯誅速在生前藐法行凶

### 續修白鹽井志

### 卷八上藝文志

雜著

### 七十五

果報捷夫影響虛誓以騙債主夢示雷霆穢污以褻神明  
夜遭刑杖違忤親養白晝投祠受笞竊藏上財生魂招考  
不爽有意竄偷幔帳兀坐就擒無辜醉罵善良飲餘魂盪  
飛鸞親劈樹妖跨壁力誅邪魍屢次示威誰逃法網若乃  
作孝作忠額云何妨不拜假仁假義見之空自抒誠高掇  
巍科全資默助職司井牧共荷澄清至其妙相香凝鍾八  
千之秀氣法軀地毓秉中五之眞精不雕琢而有象匪金  
石所能名貪狼會傳上宿雷雨又著芳聲鐵面昭彰公是  
非而宣化星光爛燦無偏反以持平錦帶珠袍善士瞻雲  
就日霜威劍氣惡逆膽破心驚從茲去惡爲善自可改轍

易行是以豐滷裕課護國佑民或賈或商咸歌樂利爲紳  
爲士莫不尊親由觀舊喬界尾百千萬家香火常馨厚德  
自楚武理永蒙二十四屬歌謠共慶芳辰走馬獻花到處  
妖氛俱淨禳災祈福隨求感格惟神斯真靈昭萬古豈但  
德被千人所願常行好事廣種福田毋利己而損物毋喪  
善以欺天三復 文昌寶訓永懷 感應鴻篇則福自  
己求神其默佑庶不愧清夜之修省邀福祉之綿聯也故  
焚香頂祝而爲之頌

病中記事

提舉 李培英

余自辛卯入春以來類多拂意之事兼之因公赴省竭來

續修白鹽井志

卷八上藝文志

雜著

七十六

一月有餘途中風熱交加飲食欠調回署後外事更多不  
順以致仲春廿四日忽患泄瀉日夜數次身熱口乾余老  
矣何能堪此因命兩小兒館生簾生前赴各廟焚香祈禱  
並向 藥王座前祈求神方醫治當蒙籤示烏藥藿香各  
五分木香一分同煎藥甫至香味沁入心脾知其與症相  
合也連服二劑瀉已大減因口占一截云無端腹疾媿河  
魚消渴相如我亦如幸有 明神傳妙劑靈籤一帖勝方  
書然瀉猶未盡止熱猶未全退也復命兩小兒祈禱求方  
如初又蒙示以三仁湯卽薏苡仁冬瓜仁桃仁也加丹皮  
同煎一服而愈續占一截句云又是靈樞第幾方上經謙

吉最爲良

籤載上經  
謙六五

陰陽氣化資調燮保我微軀賴

藥

王語雖淺近書以誌感工拙皆所不計以此見誠心神自  
叶應彼夢夢者何足以語此因思余宦滇三十餘年自慚  
薄德常恐偶蹈愆尤致干咎戾今一旦災生无妄屢荷  
神庥此後惟有倍加修省益矢精誠以期仰答保護生全  
之至意是爲記

明孝廉席忠烈公傳

咸豐三年

失名

明鼎革孫可望自蜀據滇迤東一路遭其屠戮兵至楚雄  
前明金滄道副使楊畏知盡力拒守可望佯敗誘至祿豐  
啟明橋擒之約願去其僞號不屠迤西百姓畏知志切匡

續修白鹽井志

卷八上藝文志

雜著

七十七

扶欲留身以有用始姑降之白井上珍席公者明崇禎任  
午舉人也生平忠孝立心才猷素著久爲物望所歸己丑  
六月聞流寇據滇公忠憤激發糾集義勇起兵討賊姚州  
知州何思募兵應之可望遣賊將張虎領兵來攻屢破其  
軍追至安甯草舖賊來益眾何思兵有暗地投降者引賊  
從間道而入截公歸路兵敗知州何思守備杜朝明大姚  
金世鼎俱歿於陣而公被執至滇可望見公英姿特出勇  
畧超羣欲收爲己用每以好言勸降而公罵以流賊君父  
之仇不共戴天討賊不克有死而已賊黨謂滇黔兩省皆  
聞風胆落白井地附姚一隅耳公獨奮臂當車毅然抗拒

留之必爲後患不可不除可望然其言故深恨之剝其皮至頸罵猶不絕遂磔之於昆明之市已而可望遣僞官到井督課井人李鍾武與弟鍾彥設計誘至僂夷田令家客黃起龍殺之事聞可望謂其皆公餘黨卽遣張虎領兵勦滅白井務掙公家屬欲盡殺之虎至白井感土主司威靈將謁廟瞻拜而士卒擁夫人封氏適至指虎而罵願求速死虎憐其美不忍殺之及進廟行禮令士卒環守廟門內側舊有古井封氏謂其卒曰汝眾我寡勢難得脫給其回頭乃以身墜井全家亦投水溺死虎念白井彈丸之地而忠臣節婦萃於一門其地天必佑之殺之不祥僅誅首

續修白鹽井志

卷八上藝文志

雜著

七十八

事數人撤兵而回以張虎之殘忍凶惡白井人民得以生全不至糜爛泯沒靡有子遺雖神明護持亦由公忠貫日月精誠所格也好義之士盜公遺骸與夫人合葬於東山席家墳康熙初年滇南平旌表前明節義賜其諡曰忠烈雍正年間昆明知縣朱若功倡義建三綱祠於省城東門外首以祀公白井紳士舉公崇祀鄉賢封氏入節孝祠共芳名節烈已載於滇志矣嗚呼可望暴戾恣睢肆行屠戮目無君父久矣然猶顧其名義有所憚而不敢爲者豈其本心也哉蓋因楊副使要約於生前席孝廉感化於死後一則屈身以行權一則舍生以取義二公之忠貞亮節有

以折其僭逆之心生死雖殊而忠心報國則一也當是時居高官膺厚祿屈服於賊者不知凡幾而公以一舉之榮未獲升斗之俸眇然一介而抗羣雄以千百赴鬪之民戰十萬虎狼之師勢窮力竭碎骨粉身而不悔宜可望陽雖恨其所爲而陰有取其苦志遂不禁稍發其天良羣推爲國主而不敢遽稱也卽其黨因公一死而幡然改圖知爲臣之所當忠者又不少矣夫丹心浩氣之死靡他豈忍偷活取榮以全其生哉懍懍焉皜皜焉誠白圭無玷者也然威楚已有楊公專祀而羊城猶未立席公廟者豈有待而然歟公之英魂靈氣無往不在固不繫乎祠之有無然人

續修白鹽井志

卷八上藝文志

雜著

七十九

之嚮往而興起者非祠則無以致其敬是所望於後之君子構其堂而奠焉聞其風足以感人况拜其祠而親炙之者乎庶幾忠臣義士鼓舞而起則所以正千古之人心立萬世之綱常者微公其誰與歸

白井趙李二孝子傳

威豐三年

失名

趙孝子和者白井人也生於元時父宗于元至正年間任姚安同知致任後入籍白井母楊氏生子六和居幼父早亡值元季世亂楊氏被兵擄去和年少依兄偕居白井及年十四思母不置問兄母氏安在兄答以干戈擾攘茫茫世宇焉知去向且親年已老睽違日久諒必物故尋之無

益徒自苦耳和奮然隻身欲往不辭兄而去身無路費乞食餬口跋涉山川荆棘穿經風霜刺骨困苦難堪日夜呼號行路者聞而感涕每勸之還和曰爲人子而不知有母者與禽獸何異雖生不如死之爲愈也今而後覓徧天涯不見吾母誓不歸耳好義者相贈資斧和固辭不受遠赴遼東將及過河母楊氏先一日夢見和在河邊次日卽赴河浣衣果見一少年襤褸而至詰其所自和以雲南人對來此訪母述其姓名里居楊氏始憶和生時左足心有一痣驗之果然母子乃相認抱頭大哭攜之還家母子相聚主人見其欲還留之不卽遣去和苦請乃得俱還隣人嘉

續修白鹽井志

卷八上藝文志

雜著

八十

其孝爭饋以贖初渡遼東河其船將覆倏聞空中語曰有趙孝子在焉俄爾風停浪靜水波不興同船者賴以不溺及歸中途先時虎豹傷人無厭迨和母子經過虎豹望望然去爲之遠迹同行者賴之無恙路遇賊搶刼詢其來由反其財帛轉以金相贈母年老力衰山路崎嶇和每負之以行及還桑梓和奉養數載未嘗稍懈母病故和哀痛幾絕喪葬畢不食而卒葬於井之南山春塲箐迤和未娶無子井司以其孝聞奏請入鄉賢事載通志夫和以家貧年幼隻身尋母遠涉江湖窮極遼絕異黨之域爲人所不能爲心亦苦矣如其所願負母而還遇難成祥豈非至誠所

感天作之合哉雖古之所謂仁人孝子載在史冊名聞後世者不能過也井里人士嘉其懿行播爲風聲因而革薄從忠敦倫飭紀後二百年而有李孝子焉

李孝子秀白者白井人也生於明時爲廩膳生性謙抑與物無忤早年喪父家貧嗜學事母張氏至孝每先意承志以慰母心張氏遘疾將革白焚香祝天願以身代張疾尋瘳後逾一載張無疾而逝白水漿不入口者三日哀毀骨立痛不欲生既葬白思母不已廬墓三年日夜悲泣墓前草木爲之枯槁凡飲食必祭時有兔雉馴擾墓側見白而不驚其孝行之化及於物也有司以其事聞於御史陳學

續修白鹽井志

卷八上藝文志

雜著

八十一

夔表其門曰篤孝賜冠帶榮身後至萬曆二十年卒葬於井南白塔山對面母張氏墓側井人紳士請司題入鄉賢春秋崇祀事載通志夫以白之盡孝於生前垂名於後世而出乎意想之所不及者豈有奇節異能歟不過完其情分之所固有職分之所當爲遂使孺慕之天真至老而彌篤可謂純孝無疵而爲趙公以後名教之完人者矣其可以配孔廟於不替者元惟趙公而已明則僅有李公焉豈孝道之難盡歟何其宜盡而罕有盡也人雖至愚無不知爲子之當孝而卒不得謂之孝者蓋以處變而不能如趙公之矢以至誠處常而不能如李公之獨能盡禮其孝又

焉能如二公之足以動天地而格鬼神光國史而垂後世者哉夫趙李二公者乃千萬世人心風俗之標準者也厥後順孫相繼而起皆二公之肇修人紀有以倡之孝之可以磨世勵俗感人深者正謂此耳嗚呼聞二公之風者而孝順之心可以油然而生矣故次其傳志之於石用以告萬世之爲人子者

王孝廉先世節孝合傳

舉人 張志超

節孝婦張氏者王孝廉之曾祖母也出庠生張煊適乃曾祖王九章生子肇統甫六齡而九章卒婦方二十三歲矢志柏舟曰願天佑我孤子以慰亡入於地下勞瘁吾分也

續修白鹽井志

卷八上藝文志

雜著

八十二

歷辛苦十數年爲子娶妻何氏方生一子而肇統又卒張氏悲悼之音不絕於口慟王氏之裔如帶如髮不特哀己之志怏怏未伸且重爲王氏先人哀也乃其媳何氏亦毅然篤守志節願奉姑育子焉何氏孝廉之祖母也出庠生何函才適乃祖肇統生乃君蔭遠方三歲是時何年亦二十有三惻然慰姑曰天決不絕王氏之後也姑苦志於前媳何敢有異志且王氏之有後於前人之行卜之也更於姑之德卜之今孤兒三歲雖酷罹憫凶媳能必其成立以慰姑心張汝淚然之共撫一孫婆媳寒苦瘖口曉音相爲悲憐張氏喜孫方長能就學訓之曰吾不忍爾母與我飲

冰茹荼也吾不自知其苦而常覺爾母之倍苦爾如不勉其如爾母何輒歔歔泣下其母何氏亦嘗訓子曰余恐不克擔汝父之任以報爾祖母也汝父有志報母而天阨以數余欲爲汝父圖報恃有汝耳汝不必念吾之苦汝能頃刻忘爾祖母之苦乎悽惻之音聞者酸鼻後孀姑教子成名爲子娶彭氏係州判彭泰年出生孫三人張氏年八十有三守節六十年何氏七十有五守節五十二年嗚呼天道何常天宜佑節孝之後也而天又不易佑節孝之後也爲節孝之後也者而不克自立不幾負兩世之幽貞而徒悵造物之夢夢哉及觀其子王君則又過人遠矣公諱蔭

續修白鹽井志

卷八上藝文志

雜著

八十三

遠字槐茂雖三歲失父而天性至誠每領二母之訓涕泗交流自覺四望蕭條孤身無倚懼不克淑躬以慰二孀姑於是好古嗜學書聲與啼聲相綿續矢志潔清立身方正有顯揚之志而時數不偶其事二母菽水承歡歷五十年如一日心力俱瘁建節孝坊成督學院及諸大夫薦紳先生俱表其廬因名其長子爲節昭云節昭字素華余同年兄也乾隆癸酉舉於鄉斯時年伯去世九年矣楊沈二座師皆節孝後也得吾友卷尙在躊躕及夜夢王氏先人乃決揭曉日以此語示諸同人始共信節孝之報不爽且復詔吾友而示之曰王子勉乎哉宜顧念先人勿怠汝厥修

天必相汝於蓬蒿闐寂之間以妥三世之幽魂於無恫吾友領二師之訓慘怛哀悼不忍回首自述也余因合而表之於傳

張孝廉母李太孺人節孝事略

太和舉人 趙錫源

太孺人姓李氏庠生彩廷公次女素嫻姆教喜讀閨訓烈女傳諸書年十八歸 封翁張公宸黼鹿車共挽伉儷甚篤封翁有志科名因狃匪交叛未能遂志居恒鬱鬱而太孺人常寬慰之以爲明德之後必有達人不得於身必得於子孫何事鬱鬱爲也厥後生子如翼天資迥不猶人封翁喜曰償吾志在此子也於是盡心教誨憂憤少釋乃以

續修白鹽井志

卷八上藝文志

雜著

八十四

作千家姓故大耗心血疽生耳際食飲需人太孺人侍疾惟謹年餘無少懈封翁疾大漸指子囑太孺人曰張氏香烟惟此而已幸好撫之太孺人勸其寬心養疾無太自苦詎意封翁之竟以不起也當是時太孺人行年二十有七而子甫五齡耳旣值烽烟告警又苦家計窘迫瑩瑩子立形影相吊事之難處無有逾於此者而太孺人典奩衣治喪具哀禮兼盡葬封翁於白墳先人之阡其心力之瘁爲何如矣且也自知任重不以一死而息肩守節撫孤備歷艱險是年同治丁卯秋變起倉猝冒雨逃避凡踐踏跌仆而亡與父子兄弟相失者不可勝紀而太孺人與子卒無

恙戊辰冬賊匪四散搜山同伴被虜太孺人與子以潛伏路側深草中得免井陷凡十餘次皆載木主以行雖夜有迷人之怪晝有食人之狼而母子卒全者何莫非神之陰相其苦節也已巳夏白井平太孺人以鍼黹爲生兼課子讀有過不忍撻只令長跪夜聞鷄鳴則起手製來其口授孝經論語有遺誤者則提之間有不能識者則涕泣隨之誠恐負託不效有負封翁臨終之囑也姪壻李慶良聞而異之不計修脯爲之善誘太孺人得以盡力家計年有餘羨光緒丁丑子應童子試不第太孺人泫然曰汝年十六矣不患不成名只患不苦讀過此須刻勵得慰臨終囑由

續修白鹽井志

卷八上藝文志

雜著

八十五

是教訓益嚴勞苦愈倍操煩大過四體因以不仁如翼以減算益親血疏泣禱憂懼不知所出太孺人慰之曰往者避難遇有危險先一夕必夢汝父今無夢可無憂歲己卯如翼冠童子軍與嫡堂兄如仲同榜有賀之者太孺人曰渠父昆玉前於咸豐乙卯同榜家風使然是不足賀所云賀者尙有待也聞者奇其言時太孺人有姊丈王春和僅一女而賢且素知太孺人苦節異常其後必昌願妻之以成兩美大孺人喜諾謂子曰以汝天資以吾苦節汝後當有科名向特慮汝之爲家累耳今若此吾無慮矣自此課讀益勤暇則述家常論因果其諄諄誥誡者則 聖諭六

訓 文昌陰隲文也忽一日謂子曰昨夢汝父來邀當不  
久人世所恨者不得見汝之有成也願與汝父合葬以遂  
吾心不數日疾卒時在光緒辛巳正月二十三日也享年  
四十二歲苦節十有五年子如翼於登賢書後赴部呈請  
旌表得 旨俞允今且建坊列祠嗚呼太孺人亦榮矣  
哉癸卯科試長孫之臣次孫選青仍同芹榜太孺人所謂  
家風使然者至此而益見也甲辰秋源 赴禮闈試報罷南  
旋至井小憇得與井人士相往還令子如翼源 同研士也  
談心之暇述太孺人之事特詳因記其巔末以備採風者  
擇焉

續修白鹽井志

卷八上藝文志

雜著

八十六

張孝廉母李太孺人節孝傳

姚州舉人 甘季賢

光緒王寅白井王生之臣從予遊奉其尊人孝廉張君如  
翼手書貽予予覽書孝廉張姓而生則姓從王心竊異之  
以詢生生泣對曰甚矣吾先大母之苦也大母姓李氏井  
庠生彩廷公次女年十八歸我先大父宸黼公凡十年而  
大父病卒時吾父甫五齡家又窘甚殯殮無資大母典奩  
衣治喪具已而回逆陷井大母取我太父栗主藏懷中挈  
吾父從族園之老成者避之深山難平歸里先業蕩然大  
母厘鍼黹兼製來其易於市以守其身以芘吾父及吾父  
長讀書穎悟大母姊夫王公春和異之因以吾母歸吾父

生吾兄弟四人而吾諸弟奉吾本宗祧吾從吾母姓示不忘王氏之德者大母命也甚矣吾大母之節之苦也越歲癸卯有太和趙君旭升攜其子至姚使執經於伯兄門下旭升者久客於白井者也每造予室輒述孺人事旭升曰孺人以節孝旌於朝者也夫亡抗節初終一意手拮据營生勞瘁萬狀而課子如翼讀加嚴如翼成童親授孝經論語日必二頁背誦書必竟體無躓字乃己晚年病痿劇甚如翼齧指出血寫疏籲天願減己壽益母而疾旋平然自是卧壯蓐中自卧起以至飲食溲便皆賴如翼扶持如翼晨起爲孺人盥沐並取中裙穢污浣滌之躬進朝饌畢乃

續修白鹽井志

卷八上藝文志

雜著

八十七

敢入塾散學歸又如之若是者五年而孺人卒嗚呼如翼可謂能子而孺人可謂有子矣予兩識之以爲古所稱女而有士行者殆是之謂也甲辰冬之臣郵寄事狀並孝廉趙君鏡潭所敘事略於予丐予別爲之傳予回憶之臣前言暨旭升口授皆關緒要因序次之

贊曰以母之節而有子之孝倘所謂天道者非耶夫報施之事儒者不言而福善禍淫蒼蒼者默司其柄要未始有易也李孺人抱五歲兒於危難中百折不回其志以士大夫之罕能自全者而卒克有濟天下之善孰踰是哉則天之默而相之也固宜

張君超然予同年友也其母苦節撫孤事猶歷歷如在目前今見甘君此傳敘次辭氣愿款有足感動人者嗚乎李母之賢張君之孝得此文而傳矣

舉人王守道謹識

### 張貞女傳

舉人 王守道

貞女張公

諱

福昌之女也週歲卽失恃賴父撫育性莊重

長習鍼黹頗靈敏甫十歲卽能炊爨父之晨餐夕饌皆賴貞女供奉雖弱息而鍾愛不啻佳男年十四許字王君錫誥王君少孤從母依叔父詠曾家時詠曾無出撫之如己子委禽張姓皆叔命也王君性豪爽少讀書膂力兼人能挽百鈞強弓暇輒超乘投石爲戲叔每戒而不悛未幾滇

### 續修白鹽井志

### 卷八上藝文志

雜著

### 八十八

西回匪啟衅省垣震動大僚募卒民間王聞之欲投筆從戎叔與母雖壯其志終念切似續不許行延數月賊燄孔張蔓及迤西白井亦復戒嚴會君有姨父楊仲昌者在巡撫張公亮基署爲參謀時委帶省城南防兵練詠曾見鋒煙滿地白井恐非樂土乃趣裝使投仲昌卽馳往營壘晝夜邏巡見士卒半市井無賴疲不堪用屢言於楊楊素放達不以爲意後賊眾乘不備來襲募卒果驚潰如鳥獸散楊謀與偕遁王曰大僚託公募兵厚給餉糈者所以期能戰守而爲朝廷得死力也今所募兵未戰先潰公卽能逃其如無顏見大僚何楊倉遽不能爲言王曰事急矣無已

公姑去我誓以死報言畢振臂呼健卒十餘人與賊鬪約時許眾寡不敵卒死於難貞女聞耗哀痛迫切父慰之曰死者不可復生汝勿悲行將爲汝擇快壻貞女泣謂父曰當許字時寒門窄小女得與聞命矣旣聞命則從一之道何可或忘况未嫁而亡所天女之薄命已可知矣若再待字是強與造化爭恐亦非福父如憐我但得過門以終天年女之願也父不忍拂其意商於王姓王姓以女一時激烈事後恐悔謝不納女由是飲食頓減行坐如癡漸尪弱欲死族黨悲其遇調停於兩家卒愆愆而成其志貞女入王氏門年甫十五歲謁拜家屬後卽改素妝旦起洒掃入

續修白鹽井志

卷八上藝文志

雜著

八十九

厨任烹飪孝姑與叔舅姑事奉唯謹且耐勤勞頗得家人歡心云貞女生平喜怒不形於色閒無他好惟愛聽格言善書而已其在咸豐之末也井地遭西匪蹂躪十餘次詠曾嘗憫貞女苦志雖危急之秋翁不忍棄其媳媳亦必依其翁姑故患難中亦未嘗一日偶離也及至承平家居擄掠一空食指嗷嗷詠曾乃借貲權生理就屋前貨日用所需食物時詠曾妻多病嘗在床蓐詠曾經營於外凡內一切貨殖事悉貞女經紀每售物最公平雖童穉不欺故取貨者恒盈門詠曾家計由是豐饒皆貞女力也已丑年嗣君之臣以貞女苦節由採訪節義局聞於 朝奉 旨旌

獎歿後准入祀節孝祠里黨咸以爲榮焉嗟乎王君弱冠從軍慷慨捐軀毫無顧戀古所謂殺身成仁者何以異此猥以仲昌之敗事遂寢不得聞抑何所遇之不幸耶雖然王君以身報朝廷貞女以節報王君二難既併王君亦因貞女而相得益彰矣今歲之臣年姪從予遊述往事請爲之傳道雖不文而苦節之貞何可聽其湮沒爰就所述而樂爲之傳云

贊曰吾鄉席孝廉當明末孫可望亂滇時起三姚義勇殺賊事敗不屈死之其妻封氏爲賊所擄亦不辱投井而死忠貞節烈萃於一門何其盛歟今貞女見王君舍生取義

續修白鹽井志

卷八上藝文志

雜著

九十

因而志氣激發誓不再字竟以節終雖其死節之烈不敵封之凜然而其代王君盡孝苦心已足多矣又况女未結褵與王本自無情卽改字他門人亦烏得以節繩之乃不辭荼苦甘之如飴歷四十年如一日竊謂死節之易或不如此守貞之難若貞女者媿之古之節烈賢媛何多讓焉

張貞女傳

姚州舉人甘季賢

我朝姚姬傳先生著張貞女傳首駁歸熙甫貞女論之非謂女子在父母家所許嫁者亡而爲守節終是行其志之所安而靡病於古誼其說既無以加矣予生平喜聞人談鄉曲忠孝節義事因是遠邇朋儕舉節婦貞女來告者

歲嘗數四近於白井得張貞女焉貞女之父曰福昌母陳氏早亡年十四許字同里王錫誥其父金和旋故從母依叔父春和家時春和僅一女撫之如己出問一歲錫誥從軍陣亡貞女聞耗悲痛對食則泣涕不能舉箸其父百計勸之不止問曰兒欲嫁乎曰否兒欲從王氏子地下乎曰否吾既以身許彼彼爲國亡吾爲彼死分也然彼有母與叔父母在吾必代爲子於心始卽安父知其志篤具輿馬送之王氏門喪服悉如禮制且侍其姑與叔翁姑甚謹會回匪陷白井四方奔避惟姑與叔翁姑之是從難平歸里姑與叔翁相繼歿爲先後持服者六年先是福昌以貞女

續修白鹽井志

卷八上藝文志

雜著

九十一

字錫誥而春和亦以其女字貞女之從弟如翼女歸如翼生子四貞女傷王氏乏嗣指如翼長子而言曰以若分我撫若於我爲姑姪於王氏爲舅甥王氏族無可繼者以若奉祀王氏其或自此血食乎如翼諾之議遂定如翼者雲南己丑恩科舉人也光緒己丑事聞於 朝旌焉貞女自十五歲守節至今六十有五云按姚先生張貞女傳稱貞女許嫁之夫曰葉孝思孝思父母皆老病將死獨有孝思一子又病瘵甚篤欲迎張氏侍其父母疾貞女聞卽布衣乘輿入葉氏視其公姑及夫疾一年而翁姑及孝思皆死貞女卒立族子友賢爲子而以節終於葉氏嗚呼彼得生

事其夫以及其翁姑者也此則不得生事其夫而不獲事其翁姑有族子繼夫嗣而無戾於正者也此則以外從弟之子繼夫嗣不得已而出於權遭際之幸不幸蓋未可一例論也獨其一日字人終身不改則皆躬履危變而不肯苟於自恕者也夫不肯自恕者忠臣許國之仁也聖賢守身之學也匪直靡病於古誼已也此義惜不得起姚先生一質之

合閱四傳筆墨飛舞如此奇節非此奇文不足達之也其中茹苦情形如繪有不忍卒讀者請卽登志爲幸

提

舉文源敬識

續修白鹽井志

卷八上藝文志

雜著

九十二

節孝張母羅孺人傳井序

甘季賢

張子之霖純篤士也戊戌歲來遊吾門手錄其祖母羅孺人守節事實求余爲傳余勵之曰天之報施節婦不於其子必於其孫子其勉之越歲己亥之霖果食廩餼辛丑遂捷於鄉余聞而喜曰天道誠不爽也爰筆是傳以爲世風

傳曰節婦姓羅氏白井人也羅故望族青紫之綬數十父曰萬里井庠生兄曰憲章道光甲辰科進士經章亦井庠生節婦負性貞淑未嘗以世族女崇奢習佚年十六歸同里儒士張君景德去華飾黽勉井臼間綴畸緝斷秩如也

事舅姑晨昏問視以及甘脆之供罔弗曲當老人意未幾翁姑歿景德亦遘疾不起時節婦年廿三耳子煥始識方名榮猶在襁褓椎胸茹痛欲身殉所天父母慰止之節婦齧指誓曰吾不持節終身撫此瑩瑩成立而見夫於地下者有如此日張氏家自景德歿後覆屋之下不復完瓦節婦以針縷所得供二子朝夕艱辛殆難以名狀會回逆猖獗流離瑣尾艱難備至節婦攜子避難保護直如掌珠然教之亦最有法日則令如闈闈學商業每出先指晷刻爲限稍逾則譴責不少貸夜則篝燈課讀每至夜分讀稍倦輒與誦先人清芬以鼓其立身行己之志言至切處淚嘗

續修白鹽井志

卷八上藝文志

雜著

九十三

沾襟蓋節婦夫曾祖露固乾隆丙辰科舉人爲廣西荔蒲縣令有政聲祖作相井貢生選永平縣訓導父璽以來席豐履厚頗稱繁盛至節婦痛失所天遭罹厄運對茲雙雛形單影隻言念及此不禁潛然曰汝父歿時吾所以不死者謂無人撫汝則張氏之先緒無以復振也聞者莫不爲之酸鼻而節婦心堅如石志潔如冰數十年如一日也難平二子長成督令卒儒業燠遂擷芹榮亦入國學光緒庚辰年以疾卒春秋五十又六學使者戴公按臨楚棚廉其概獎之歲在辛卯節婦姪其澤孝廉赴禮闈以事聞於

旨旌焉

贊曰先儒呂氏云守節之婦視死者之難不啻什伯天地常經古今中道惟守爲正有旨哉張節婦不幸遇所天天折脫令從夫一死詎不足與節烈者速一日之聲譽然而幼孤罔依坐斬夫祀雖心可自信而道猶未全昔程嬰謂杵臼曰立孤與死孰難嬰曰死易立孤難耳臼曰子彊爲其難者吾爲其易者蓋曰不死節嬰無以存孤嬰不存孤臼亦徒爲死節二子之忠於趙氏合之則兩得離之則兩傷有依倚焉若節婦齧指一誓持之終身彼安計死節之易於存孤存孤之難於死節哉亦行乎心之所安耳不以續修白鹽井志

卷八上藝文志

雜著

九十四

貧降志不以變易心卓然中立而不倚此大丈夫事也乃婦人能之嗚呼難矣

英烈張處士傳

咸豐七年

進士

羅憲章

庶人何紀紀英烈也英烈何人張處士也何稱英烈嘉殉公也殉公者士夫之責也何以不書無可書者也張公外無殉公者乎曰有義士何君永興亦殉公者也彼胡不書有書之者無庸贅也川練同謀胡又不書假公非殉公也殉公何據以二君皆死於回匪之役也故曰殉也丁未秋逆回僣成龍等入寇殆欲得我井而甘心焉夫我井豈遂無人哉何令彼猖獗如是也有內奸也僣成龍率其黨百

餘人入我白井垂涎我公局嘯聚我南方搖動我人心劫掠我隣境我白井司招募鄉勇眾團集聚遂致外練之變是役也殺人者逃主使者遁事未旋踵大獄牽連當途者憂之公曰是何難哉吾將上叩法臺蕩世魑魅事變則吾死當途者曰君果若是乎吾以身家與子公曰否否是貨我也遂付獄受酷刑因之經年不得直乃死君子曰極刑不懼英風孑然殉公致死有烈氣焉公之生平於此可概見矣詩云糾糾武夫公侯干城其此之謂歟

香水河解

光緒二十六年

恩貢

甘世忠

河何云香因水而名水香奚自因數奇之不偶神靈之莫

續修白鹽井志

卷八上藝文志

雜著

九十五

測理殊難憑而事確有據以一旦非常之變成千古不易之名雖人所儼若天所命其故何哉昔者河伯興災水滌爲患汜濫於五井衍溢至半山民人失措張皇升高越嶺老弱概作波臣編戶盡屬鱗族廟宇傾頽泥堦者如土委地寺觀坍塌金鑄者仰面朝天沿河橋梁漂流殆盡一瞬息而千萬里焉迺土主神像緣香樹結篆以成篤生岩阿亦不知托根於何地鍾毓於何時幾歷春秋幾經風雪或無懷氏或葛天氏之民所見重畏而愛之則而相之旣雕其樸亦琢其華又從而廟貌之爰是作鎮中央臨下有赫資保障於一方顯威靈於萬古及封勅唐代凜然無復

未雨之謀詎料數奇不偶神靈莫測頃遭洪水之變南泉  
**滲濛**北流**聒聒**羣山眾壑濟赴羊城一時澎湃洶湧人力  
救死不贍水漂木浮萬難保其無虞矣猶幸狂瀾既倒漩  
泊河灣香像淳留無恙險阻既遠流離失所之眾逡巡復  
還心寒胆慄且驚且喜悚然而相聚曰是何不幸之幸微  
神力不及此因而互相踴躍修廟妥神告虔禱祝感香像  
之永存愿河清以常保自此水流不驚使民得所安息且  
慮年湮代遠後世疑爲荒誕安而忘危欲其顧名思義遂  
相傳而呼以香水河云或曰井河上流一帶沿岸水濱多  
產蘋藻香附香茹之草桃李杏梅之花四時芬芳水流花  
續修白鹽井志

卷八上藝文志雜著九十六

放因此得名說亦近似

觀風示

光緒二十四年十月

署提舉

李訓鉉

蕙臣

照得士爲四民之首表率宜先學該百行之全楷模並式  
家修廷獻庶幾朝有大儒日就月將乃可出而應世况夫  
鶉首啟文明之曜羊城鍾山澤之靈迴龍飛鳳萃精華幾  
等龍樓鳳閣金字寶關壯形勝如瞻金簡寶書跡其往賢  
趙處士異域尋親千古純孝王廣文挂冠歸隱一代高風  
他若列鼎鳴鐘筆難罄述偉人文士史不絕書或謹躬修  
或精文藝固地靈而人斯傑亦學粹而道彌光前哲非遙  
溯淵源之有自後塵可步豈嗣響之或難欲探杏桂於春

秋必肄詩書於冬夏看江花處處須知風雅事其尚有之  
覩謝樹家家勿謂古今人不相及也矧值

聖朝重熙累洽

皇上勵精圖治前改六條專門原除雷同積習茲復八股舊制  
允宜風氣克端尙其則古稱先由躬行以達於議論尤冀  
鎔經鑄史本心得而發爲文章本府孝友傳家簪纓繼世  
棄書讀律謀供菽水之歡投筆從戎謬列刻章之舉蓋緣  
迹羈宦轍遂爾學淺經傳也茲雖仕版初登竊幸斯文獲  
覩非敢品題人物聊以宏獎英才謹選良辰合行曉諭爲  
此示仰 知悉卽於 日 刻齊集龍吟書院聽候本

續修白鹽井志

卷八上藝文志

雜著

九十七

府親臨扃試暫輟散詩說禮之功惠而好我試將酌雅稟  
經之學取諸其懷詩貴能工文求如法別開生面豈徒摘  
句尋章勿拾唾餘自然翻瀾倒海本府有厚望焉諸生其  
各勉之

王節孝孺人傳

訓導 許克誠

節孝婦王氏庠生方行之女羅其俊之妻也青年矢志制行過人光緒二十九年刑部員外郎馮桂芳呈其守節事實於

朝

詔旌之潛德幽光闡揚至矣又奚俟更贊一辭而其懿範尤有足述者初氏之歸其俊之五年也夫以疾卒氏悲不自勝誓以死徇其翁姑責以義當撫孤氏亦卽止未幾子羣儒成童而殤乃語其夫弟其昌曰天乎不相吾夫又天無子吾何敢怨天而惟是自揣薄命不如死之愈也雖然翁姑

續修白鹽井志

卷八

藝文志

九十八

老矣叔善事之未亡人所以苟活至此者欲上爲夫事親下爲夫存嗣已也今已矣無復望矣吾惟有死而已矣哀痛之音感動左右其昌悲其志而又懼果如其言重以傷親心也乃以大義止之曰禮大宗無子小宗繼之父母云邁親心不可重傷昌幸有子羣生惟嫂撫之是卽所以慰吾親而安吾兄之靈於九京者也氏聞而興起破涕爲笑曰可今而後吾以完吾節易以完吾孝矣自是安之若素撫嗣子若己出幼課讀長貢成均孫四人蘭芬桂馥一門稱盛遺澤遠矣故爲之傳而又贊之贊曰婦以夫爲天旣奪其天而以一死自鳴此烈子之所

能也孺人當鸞鏡分飛之際忍死須臾不卽從夫地下者  
曰賴有子耳子死而痛不欲生於情雖篤於理未安其終  
能延夫之宗祧而全其軀以完其行者恃有此轉念之明  
耳夫上有垂白之親而能終其事下有垂髻之姪而能撫  
其成含辛茹苦凜冰兢者四十一年此豈烈女子所能一  
二哉其克全其天者至矣禮稱竹箭詩美栢舟有以夫

續修白鹽井志

卷八

文藝志

九十九